

## Rau Tau Paulus Iboode Pa Yes Korin Imin Maata 1 Korin—1 Corinthians

<sup>1-2</sup> Yau Paulus. Maaron ipoi ghau namin le, ve ighur ghau namin mbanjoona to Yesu Krisi itaghon i tauu loolo. Yeiru tonvetaz toit Sostenes nibood rau tane ilat pa yam tau aleep ila lupuun to Maaron izi nugh Korin na. Yam apaak Yesu Krisi ve aleep ila tooni, tauta amin tamtamon tooni patabuyaana wa. I ipoi gham amin le, leso ataghon ngar patabuyaana imin i tauu. Ve yam mon mako. I igham tauvene pa tamtamon tisov to nughmarina tau tisujsun ila Tiina toit Yesu Krisi eeza na. I tiina toozi, ve tiina toit paam. \*

<sup>3</sup> Poia to Tamaan Maaron ve Tiina toit Yesu Krisi izaa tsiam, ve tinjin gham aleep poia toman lolomim luuma. Onoon.

*Paulus ipait Maaron pasaa i ighur poia tooni tiina izaa to yes Korin*

<sup>4</sup> Saawe isov, yau napait Maaron payam toman lolog poia. Pasaa, ila uraat to Yesu Krisi, Maaron ighur poia tooni tiina izaa tsiam. <sup>5</sup> Yam tau apaak Krisi ve aleep ila tooni na, Maaron Avuvu irei ngar popoia maata maata katini payam. Tauta aghazoon pa ngar popoia naol, ve avovotia Maaron aliina ila eez maata maata. \*

<sup>6</sup> Maaron Avuvu igham uraat toman tapiri ila somim. Tauta aghilaal aghe saveen to Krisi tau

---

\* **1:1-2:** 1Kor 6:11; 2Tim 1:9      \* **1:5:** 1Kor 12:7+; 2Kor 8:7

nisavia payam na, ene onoon, ve akisi ariaañ.  
 7 Tauvene aazne, ambool pa tapiri, ma n̄gar poia eta tau Maaron Avuvu ireii pait ne mako. Ve asasañan aghe le aghita saawe to Tiina toit Yesu Krisi imuul ilam ve Maaron itotoia ivot ighazooñ.  
 \*

8 Maaron tauu pale ipalot gham, ve igham gham ayooz ariaañ le azaa pa saawe tau i ighuru payam na. Leso saawe tau Tiina toit Yesu Krisi imuul ilam, i aat ighit gham ighe lemim sosor eta mako.

9 Iit irau tanumeer Maaron. Pasaa, i itataghon saveeñ tooni irau saawe. Ve ipoi gham gha yamña Naatu Yesu Krisi avalupu gham amin eemon wa.  
 \*

*Paulus isaav ariaañ pa yes Korin ighe tivarewai zi sov*

10 Yam ton̄vetaz, yau naghe napalot gham ila Tiina toit Yesu Krisi eeza tauvene: Avarewai gham sov. Yam asov alup lolomim ve n̄gar tsiam imin eemon, ve azuari gham pa taghoniin n̄gar eemon.  
 \*

11 Yam ton̄vetaz, yau nasavia saveeñ tane pasaa, Kloe tamtamon tooni siriv tilam, ve tipaesia varumim payau tighe parzoraañ naol ivotvot ila somim. 12 Ene nasavia n̄gar tsiam tau avavalaghi gham, ve yam siriv asavsaav aghe: “Yau nataghon Paulus,” ve siriv aghe: “Yau nataghon Apolos,” ve siriv aghe: “Yau nataghon Petrus,” ve yam siriv aghe: “Yau nataghon Krisi.” N̄gar tana, yam asov aghamghamu. \*

---

\* **1:7:** Pil 3:20; 1Tes 1:10; Tit 2:13      \* **1:9:** Pil 1:6; 1Tes 5:23+; 1Pe 5:10      \* **1:10:** Ro 12:16; Pil 1:27, 2:2; 1Pe 3:8      \* **1:12:** 1Kor 3:4+

13 Mindai, yam aghe avalagh Krisi imin n̄giira n̄giira? Ma aghe yau Paulus naghām niamim, ve tirav ghau izala ai pambarooñ payam? Ma yam aghām yaa pa yau ezag? Mako. 14 Yau napait Maaron toman lolog poia pasaa, naghām yaa pa yam eval mako. Naghām yaa pa Krispus ve Gaius mon.\*

15 Tauvene tamtamon eta irau isaav ighe: “Yei tane nighām yaa pa Paulus eeza.” Vene mako.

16 O, n̄garig gha matag in̄gal. Yau naghām yaa pa Stepanas ve yes tau tileep tomania ila ruum tooni na paam. Ve yam siriv, lolog iveegh. Naghām yaa payam, ma mako?\*

17 Puughu tau yau naghām yaa pa yam eval mako, ene vene: Krisi imbaañ ghau to naghām yaa pa tamtamon mako. I imbaañ ghau to navotia vaaru poia. Ve i ighe saawe tau navotia vaaru poia, yau irau nasaav imin yes n̄gara to taan tau tighamghām pa tauzi ezazi ne mako. Pa ighe naghām tauvene, ene pale narav matin ai pambarooñ to Krisi tapiri, ve tamtamon tighita ai pambarooñ tooni imin kaut sorok.\*

*Mateegh to Krisi izala ai pambarooñ itotoi ighe Maaron n̄gar tooni, ene ite kat pa n̄gar to iit tamtamon*

18 Onoon, saveeñ tau isavia mateegh to Krisi izala ai pambarooñ, yes tau titaghon eez to tilalez na, tighita tighē ene saveeñ to yes kankanooñ. Eemon iit tau Maaron ighamghām uratōi ghiit

---

\* **1:14:** Mbañ 18:8; Ro 16:23  
1Kor 2:1+

\* **1:16:** 1Kor 16:15

\* **1:17:**

to igham mulin ghiit ne, taghilaal taghe: Saveen tawe, Maaron tapiri igheen ila. \*

<sup>19</sup> Saveenja, Maaron isavia gha tiboode pataghaan wa. Ighe:

“Zeran ngara to taan, yau aat navaghamunia ngar toozi le tivaghamgham.

Yes tau tigde tighazonj kat pa ngar tintiina na, yau pale naghham ngar toozi imin kaut sorok, ve le anoonja mako.” \*

<sup>20</sup> Ighe vene, pale tasaav mindai pa yes ngara to taan, ve yes tau lezi ngar tintiina pa tutuun to Mose, ve yes tau aazne tivavazorai zi pa savsaveen ma ngar ne? Pale tapait zi? Mako. Pasaa, ngar tau tamtamon to taan tipapakur tauzi pani na, ene Maaron ipaghazonjaini ighe ene ngar to yes kankanooja. \*

<sup>21</sup> Maaron, i ngar tooni tiina, ve ighita ighe poia to ipoon eez pa tamtamon to taan, lesa tipait tauzi ezazi sov. Tauta yes ngara to taan ngar toozi irau iuul zi to tiwatagh Maaron mako. Maaron ighe itaghon eez ite to igham mulin tamtamon. Ene saveen to Krisi tau nivovotia ne. Onoon, yes tau titaghon taan ngara na, tighita saveen tane tigde ene saveen to yes kankanooja. Eemon yes tau tighur ila saveen tane, Maaron pale igham mulin zi. \*

<sup>22</sup> Yes Yuda tizoornugh tigde tighita gabua ngeretazi ivotvot imin ilaal pazi, o tighur ila. Ve yes Grika tizuari zi pa lonjaan saveen to yes ngara

---

\* **1:18:** Ro 1:16; 1Kor 2:14; 2Kor 4:3  
Is 44:25; Lu 10:21; Ro 1:22; 1Kor 3:18

\* **1:19:** Is 29:14    \* **1:20:**  
\* **1:21:** Mt 11:25+

to taan tau tighita tigde le puughu tiina. \*

<sup>23</sup> Eemon yei nivovotia saveeṅ pa mateegh to Krisi izala ai pambarooṅ. Saveeṅ tane, saawe tau yes Yuda tilooṅa, tirere pani ve tighur ila mako. Ve saawe tau yes Griika tilooṅa, tivelegghi tigde ene saveeṅ to yes kankanooṅa. \*

<sup>24</sup> Eemon yes tau Maaron ipoi zi timin le na, yes Yuda ve Griika paam, yes tighilaal tigde Krisi, i itotoi Maaron tapiri ve ṅgar tooni ivot ighazoon pait. \*

<sup>25</sup> Onoon, yes tau titaghon taan ṅgara na, tiveleggh Maaron ṅgar tooni tigde ene ṅgar to yes kankanooṅa. Eemon mako. ṅgar tooni tiina. Iliiv kat pa ṅgar to iit tamtamon. Ve uraat tau Maaron ighamu na, \*

tauvene paam. Tamtamon tivelegghi imin kaut sorok, ve tighita tigde le tapiri mako. Eemon uraat tawe, tapiri tiina kat. Iliiv iit tamtamon tapiriin. \*

*ṅgar to Maaron, ene ite kat pa ṅgar to taan*

<sup>26</sup> Yam tonvetaz, agham ṅgar pa taumim. Saawe tau Maaron ipoi gham amin le na, gabuamim mindai? Zeran tau titaghon ṅgar to taan na, tighita tamtamon tsiam katini tigde lezi ṅgar tiina mako. Ve tigde lezi ezazi ve tapirizi to tigham gabua eta mako, ve ziiri waaro toozi paam, lezi ezazi mako.

<sup>27</sup> Tauvene aghita. Yes tau tamtamon to taan tiveleggh zi tigde lezi ṅgar mako imin kankanooṅa, tauta Maaron igham zi timin le, lesu ipamayanṅin

\* **1:22:** Yo 4:48; Mbaṅ 17:21      \* **1:23:** Yo 6:60+; 1Kor 2:2, 14

\* **1:24:** Ro 1:16; Kol 2:3      \* **1:25:** Uraat tau Paulus isavia na, ene mateegh to Krisi ve burigiin tooni.      \* **1:25:** 2Kor 13:4

zeran ngara to taan. Ve yes tau tamtamon to taan tighit zi tigha tapirizi imbool, tauta Maaron igham zi timin le, leso ipamayanjin yes tau tapirizi tiina na.\*

<sup>28-29</sup> Ve yes tau lezi ezazi mako, ve tamtamon to taan matazi veleghin zi, ve tighit zi timin kaut sorok, tauta Maaron igham zi timin le. Leso ipaghazonjai yes tau ezazi tintiina na ighe ezazi tawe, ene kaut sorok. Pasaa, i loolo pa tamtamon eta ipait tauu eeza ila i maata mako.\*

<sup>30</sup> Maaron tauu ta igham gham apaak Yesu Krisi ve aleep ila tooni. I ighur Yesu Krisi to ipaghazonjai ghiit pa ngar tooni leso taleep poia. Ve Krisi ta igham ghiit taduduun ila Maaron maata, ve igham ghiit tamin tamtamon tooni patabuyaaŋa, ve ipas ghiit pa saghati tapiri, leso tamin besoonja pani muul sov.\*

<sup>31</sup> Tauvene tataghon saveeŋ tau tiboode pataghaan na:

“Tamtamon tau loolo pa ngar to pakuruun, na i aat ipakur Njeer Tiina pa ngar tau i ighamghamu.”\*

## 2

### *Paulus isavsav imin yes ngara to taan mako*

<sup>1</sup> Yam tonjvetaz, matamim ingal. Saawe tau nalat gha navotia Maaron aliiŋa payam, yau nasavia saveeŋ puughu ariaaŋa imin yes ngara to taan tau tighamgham pa tauzi ezazi na mako. Yau

---

\* **1:27:** Mt 11:25; Yems 2:5 \* **1:28-29:** Ro 3:27; Ep 2:9 \* **1:30:** Ro 3:24; 2Kor 5:21; Ep 1:7; Pil 3:9 \* **1:31:** Yer 9:23+; 2Kor 10:17

nasavia saveen raurauai payam, lesa aghazoon pa Maaron ngar tooni. Ngar tawe, muun iyoon, ve aazne ivot ighazoon wa. \*

<sup>2</sup> Pasaa, saawe tau nalat gha naleep tomani gham, ngar tsiau iyaryaan naghe nasavia Yesu Krisi vaaru mon, ve mateegh tooni izala ai pambaroon. \*

<sup>3</sup> Saawe tau naleep tomani gham, roin tiina igham ghau le tinig irur, ve nayamaan naghe tapirig imbool. \*

<sup>4</sup> Ve saawe tau navotia vaaru poia payam, yau nasavsaav imin yes ngara to taan to naghham lolomim ne mako. Eemon Maaron Avuvu igham uraat toman tapiri ila lolomim. Tauta itotoi ighe saveen tau nasavia payam na, ene saveen onoon. \*

<sup>5</sup> Nataghon eez tauvene, lesa tamtamon ngar toozi imin puughu pa ghuruun ila tsiam sov. Naghe Maaron tauu tapiri imin puughu pani, o poia. \*

*Maaron Avuvu ipaghazonai ghiit pa Maaron ngar tooni*

<sup>6-7</sup> Eemon yes tau ngar toozi imatuugh pa Maaron ve saveen tooni na, yei nisavsaav pazi pa ngar tiina to Maaron tau muun iyoon ve aazne ivot ighazoon. Muun geeg, saawe tau sambam ve taan tivot soone, i igharaat eez pataghaan wa, lesa igham ghiit tala taleep tomania ila mbonari loolo. Ngar tooni tawe, ite kat pa ngar tau yes ngara to taan

---

\* **2:1:** 1Kor 1:17      \* **2:2:** 1Kor 1:23; Ga 6:14; Pil 3:8      \* **2:3:** Mban 18:9; 2Kor 11:30, 12:5, 9      \* **2:4:** 1Kor 4:20; 1Tes 1:5      \* **2:5:** 1Kor 4:20; 1Tes 1:5

tisasavia pa saawe tane. Ve yes tau tighamgham pooz pa saawe tane \*

tikankaan pani paam. Yes pooza tawe, murei Maaron pale itatan zi timin kaut sorok. \*

<sup>8</sup> Toozi eta ighazoon pa Maaron ngar tooni mako. Ve imin ta tighazoon pani, kanaan irau tirav Tiina toit Yesu tau eeza tiina pa tapiri ve poia tooni na izala ai pambaroon mako. \*

<sup>9</sup> Ngar yonggaanja to Maaron tau nisavsavia ne, ti- bood saveenja pataghaan tigde:

“Maaron igharaat gabua popoiazi naol pa yes tau lolozi ighen tooni na. Gabua tawe, ite kat. Tamtamon eta ighit zi pa maata, ma iloon varuzi pa taliinja soone. Ve tamtamon eta irau igham ngar pazi paam mako.” \*

<sup>10</sup> Eemon iit, o Maaron ipaghazonjai ghiit pa ngar tooni yonggaanja tana ila uraat to Avuvu Patabuyaan wa. Maaron Avuvu ighita gabua naol isov. Ngar yonggaanja kat tau ighen ila Maaron loolo na paam, Avuvu ighita. \*

<sup>11</sup> Laak, sei iwatagh katin tamtamon ite loolo? Mako. I tauu mon ta iwataghi. Maaron tauvene paam. Tauu Avuvu mon, ta iwatagh katin loolo. Ite paam mako. <sup>12</sup> Avuvu tau iit taghamu na, i itaghon ngar to taan mako. I ivot ila to Maaron tauu. Maaron igham Avuvu pait, lesa tawatagh gabua popoia tau i irei zi pait itaghon tauu loolo

---

\* **2:6-7:** Yes pooza tau Paulus isavi zi na, ene yes daaba sasaghati to taan, ma Njeer Saghati tomania avuvu sasaghati siriv. \* **2:6-7:**

Ro 16:25+; Ep 3:5, 9; Kol 1:26; Yems 3:17 \* **2:8:** Lu 23:34; Yo 16:3;

Mbanj 13:27; 2Kor 3:14 \* **2:9:** Is 64:4; Yer 3:16 \* **2:10:** Mt

13:11; Yo 16:13; 1Yo 2:27



ve poia tooni na. †

<sup>13</sup> Tauvene yei nisavsav pa gabua tane. Ve ngar tau nisasavia ne, yei nighamu ila to yes ngara to taan mako. Maaron tauu Avuvu, ta ipaghazonjai ghei pani, ve ighamgham pooz pa saveen isov tau nisasavia ne. Tauvene saveen onoon tau Maaron Avuvu isavia payei, tauta nipaghazonjai puughu pa yes tau titaghon ngar to Maaron Avuvu. \*

<sup>14</sup> Isaav ighe neer eta itaghon ngar to tamtamon mon, i pale izor ngar tau ilam pa Maaron Avuvu na, ve ighita ngar tawe imin ngar to yes kankanoona. Irau ighazonjani mako. Pasaa, Maaron Avuvu iuul ghiit, o tagabiiz poghania ngar tana, ve taghazonjani. \*

<sup>15</sup> Tamtamon tau ighe itaghon ngar to Maaron Avuvu, ene irau igabiiz poghania gabua naol isov ve ighilaal: saa ta poia, ve saa ta saghati. Tamtamon tauvene, yes tau titaghon taan ngara na, irau tigabiiza mako. ‡ \*

<sup>16</sup> Pale tigabiiza mindai? Mako. Pasaa, saveen igheen pataghaan ighe:

“Sei iwatagh katin ngar to Maaron, ve irau ipaghazonjaini pa ngar siriv? Mako.” \*

Eemon iit, o ngar to Krisi igheen toit. \*

---

† **2:12:** Gabua popoia tau Paulus isavi zi na, ene gabua tau tagham zi ila mateegh to Krisi izala ai pambaroonj. Ene gabua tauvene: Krisi ireu sosor toit, ve igham ghiit taduduunj ila Maaron maata, ve irei Avuvu Patabuyaanj pait. \* **2:13:** 1Kor 1:17, 2:4 \* **2:14:** Yo 6:44, 14:17; Ro 8:5+; 1Kor 1:18, 23 ‡ **2:15:** Saveenjiiri tane aat injarui tamtamon siriv to Korin tau tivelegh Paulus pa uraat tooni, ve tiyauyau avozi pani. Ughita 2Kor 10:10. \* **2:15:** 1Tes 5:21

\* **2:16:** Ro 11:34 \* **2:16:** Ro 12:2; Ep 4:23

### 3

#### *Yes Korin, ngar toozi imatuugh soone*

<sup>1</sup> Yam tonvetaz, muun yau irau nasaav payam imin nasavsaav pa yes tau titaghon ngar to Maaron Avuvu na mako. Pasaa, saawe tana, yam akis Krisi tunja ila ngar tsiam soone. Ngar tsiam ngaala imin geegeu, ve ataghon ngar to lolomim munjaana. <sup>2</sup> Tauta naghama aniiñ ariaaña payam mako. Napaghun gham pa tuz mon. Pasaa, saawe tana, yam irau aghan aniiñ ariaaña mako. Ve aazne paam, naghita gham arao soone. \*

<sup>3</sup> Aghita. Parzorañ naol ivotvot ila sosomim ve ngar tsiam iyaryañ aghe atatan zeetmimña, ve agham zi titaghon ngar tsiam mon. Ene itotoi ighe yam atataghon lolomim munjaana soone. Laghoon tsiam, ene imin yes tau titaghon taan ngara. \*

<sup>4</sup> Pasaa, yam siriv aghe: “Yau nataghon Paulus,” ve siriv aghe: “Yau nataghon Apolos,” Ngar tsiam tana, ene itotoi ighe yam ataghon tamtamon to taan ngar toozi.

#### *Uraata tisov to Maaron tizuari zi pa gabua eemon*

<sup>5</sup> Laak, Apolos, ene sei? Ve yau Paulus, sei? Yeiru besoonja mon to Tiina toit Yesu Krisi. Yei nigham uratoi gham, tauta aghur ila tooni. Onoon, i ighur lemai uraat ite ite. Eemon yeiru nigham uraat pa Neer eemon. \*

<sup>6</sup> Uraat tsiau, ene imin navazogh aniiñ ila uum. Ve Apolos uraat tooni, ene imin igham uratoi uum

\* **3:2:** Hib 5:12+; 1Pe 2:2

\* **3:3:** 1Kor 1:10, 11:18; Yems 3:16

\* **3:5:** Mbanj 18:1, 18:24+

ve igham yaa gha itutur aniiņ. Eemon Maaron ta igham aniiņ itum iza. \*

<sup>7</sup> Neer tau ivazogh aniiņ, ve neer tau igham yaa ve itutur aniiņ na, yesuru lezi ezazi mako. Maaron mon ta i le eeza. Pasaa, i ta igham aniiņ itum ve anooņa ivot. <sup>8</sup> Tauvene neer tau ivazogh aniiņ, ve neer tau ighamgham yaa ve itutur aniiņ na, uraat toozi, ene puughu eemon. Ve murei, Tiina toozi pale igham lezi atuya iduduņ pa uraat toz toz. \*

<sup>9</sup> Tauvene yeiru Apolos nilup ghei ve nigham uraat tau Maaron ighuru ila nimamai. Ve lupuuņ tsiam, ene imin uum to Maaron ve ruum tau i ilepleep ila. \*

*Yes tau tigham uratoi lupuuņ to Krisi na, timin zeran to raon ruum*

<sup>10</sup> Poia to Maaron iza tsiau, ve i igham pooz pa uraat tsiau. Tauta namin neer tau iwatagh katin uraat to raon ruum, ve imuņmuuņ pani. Uraat tau naghamu ila sosomim, ene imin napayooz rir imin puughu pa Maaron ruum tooni. Ve aazne, tamtamon siriv anazi tiseeņ uraat to raon ruum tawe. Sei tau ighe igham uraat pa raon ruum na, i aat igham ngar poi ve irau poghania ruum anooņa izala rir tawe itaghon ruum taama ngar tooni. \*

<sup>11</sup> Tamtamon eta irau ipayooz gabua ite paam imin rir pa ruum tawe mako. Yesu mon ta imin rir pani. Ve rir tana, yau napayooze wa. \*

<sup>12</sup> Yes tau tirau ruum anooņa na, siriv tirao pa mal-moon arianazi imin gol, silva, ve maet popoiazi

---

\* **3:6:** Mt 13:3+      \* **3:8:** Ro 2:6      \* **3:9:** Ep 2:20+      \* **3:10:** Ro 15:20; 1Kor 4:15      \* **3:11:** Ep 2:20

siriv. Ve siriv tirao pa malimooŋ tau arianaŋazi mako imin ai, regh, ve gabua siriv. <sup>13</sup> Tala tala le ighe tazaa pa saawe to gabizooŋ ivot, mako yes tau tirau ruum na, uraat toozi anooŋa ivot ighazooŋ. Gabizooŋ tawe ŋgara, ene imin tamtamon tighur gabua ila yav, leso titoova ve tighita: Ene gabua arianaŋa, ma gabua sorok? Ighe tirau ruum pa malimooŋ arianaŋa, ene pale yav tawe irau ighani mako. Eemon ighe tirau ruum pa malimooŋ tau arianaŋa mako, ene pale yav ighan uraat toozi gha ilale. \*

<sup>14</sup> Tamtamon tau ighe irau ruum to Maaron pa malimooŋ arianaŋa, ene gabizooŋ to Maaron irau igham gabua eta pa uraat tooni mako. Tauvene saawe tau gabizooŋ tana isov, ene aat uraat tooni anooŋa tawe ighengheen, ve Maaron igham le atuya poia. <sup>15</sup> Eemon isaav ighe tamtamon eta irau ruum to Maaron pa malimooŋ soroksorok, ene pale yav ighan uraat tooni, ve le anooŋa mako. Onoon, i tauu pale ileep poi. Eemon i imin ŋeer tau yav ighan suvinia ruum tooni, ve ighau ivot ila muuri toman niima ŋginaaŋa.

### *Lupuun to Krisi imin rumei patabuyaan to Maaron*

<sup>16</sup> Yam awatagh mako? Lupuun tsiam, ene imin Maaron rumei tooni patabuyaan tau i ilepleep ilonj ila. Ve Maaron Avuvu ilepleep tomani gham ila lupuun tsiam loolo. \*

<sup>17</sup> Tauvene ayamaan gham. Pasaa, lupuun tsiam, tauta imin rumei to Maaron. Ve rumei tana, ene gabua tooni patabuyaan. Tauvene isaav ighe

---

\* **3:13:** 1Kor 4:5      \* **3:16:** 1Kor 6:19; 2Kor 6:16; Ep 2:21+; Hib 3:6; 1Pe 2:5

tamtamon eta ivaghamunia, ene i paam, Maaron pale ivaghamunia.

*Pale tagham ngar mindai pa Maaron uraata tooni?*

<sup>18</sup> Yam agham karom pa taumim sov. Isaav ighe tsiam eta ighe i irau kat pa ngar to taan tau aazne tamtamon tizuar zi pani ne, i aat ighur muuri pa ngar tawe, ve itaghon ngar to Krisi tau tamtamon to taan tighita imin ngar to yes kankanoonja. Leso ighazonj pa Maaron ngar tooni, ve eez to ileep poia. <sup>19</sup> Pasaa, ngar naol tau tamtamon to taan tipakur zi pani, ene Maaron ighita ighe ene ngar to yes kankanoonja. Saveenja tiboode pataghaan tauvene:

“Zeran ngara to taan titaghon ngar naol tigue pale iuul zi to tileep poia. Eemon ngar toozi tawe pale imin liis pazi, gha lesa Maaron ikis zi.” \*

<sup>20</sup> Ve saveenji ziiri ite isaav ighe:

“Maaron iwatagh: Ngar naol tau zeran ngara to taan tivavazorai zi pani na, ene le anoonja mako.” \*

<sup>21</sup> Tauvene ngar to pakuruunj tamtamon ezazi, yam apuli ileple. Pa gabua isov, ene yam tsiam. Maaron ighur zi to iuul gham. <sup>22</sup> Paulus, Apolos, Petrus, taan tane, lepoogh tsiam, mateegh tsiam, gabua tau aazne tighengheen, ve gabua tau pale ivot murei na paam. Gabua isov tawe, ene tsiam mon. \*

<sup>23</sup> Ve yam to Krisi. Ve Krisi, i to Maaron. \*

---

\* **3:19:** Yop 5:13; 1Kor 1:20      \* **3:20:** Mbo 94:11      \* **3:22:** Ro 8:28, 38-39      \* **3:23:** Ro 14:8

## 4

### *Maaron pale igabiiz uraata tooni*

<sup>1</sup> Tauvene tamtamon irau tigham n̄gar pa yei uraata tauvene: Yei besooᅇa to Kriᅇi. I inumeer ghei, ve ighur saveeᅇ tooni ilam tsiei leso ningini. Saveeᅇ tane isavia Maaron n̄gar tooni tau muuᅇ iyoᅇ, ve aazne ivot ighazoᅇ. \*

<sup>2</sup> Besooᅇa tau ighe tiina tooni inumeera ve ighur gabua ila niima to ᅇgini, ene i aat ᅇgini poghania gabua tana itaghon n̄gar to tiina tooni. \*

<sup>3</sup> Tauvene isaav ighe yam, ma tamtamon siriv agabiiz ghau aghe yau poiag, ma saghatig, ene naghām n̄gar pa tana geeg mako. Ve irau nagabiiz taug naghe yau poiag, ma saghatig, ene paam mako. <sup>4</sup> Onoon, yau naghe uraat tsiau, naghām sosor eta mako. Eemon irau nanumeer sorok naghe n̄gar tsiau isov iduduᅇ ne mako. Naleep ve nasaᅇan gabizoᅇ to Tiina toit tau murei pale ivot, o i tauu igabiiz ghau. \*

<sup>5</sup> Yam tauvene paam. Reᅇia agabiiz tamtamon ve aghe yes sasaghatizi, ma popoiazi sov. Aleep ve asaᅇan saawe to Tiina toit Yesu imuul ilam. Pa saawe tana ighe ivot, i pale ivotia gabua tISOV tau tiyoᅇ ila ndoroom, tomania n̄gar isov tau igheen ᅇgozaᅇ ila tamtamon lolozi na, ivot ighazoᅇ. Mako Maaron tauu ipait tamtamon eᅇaᅇa itaghon n̄gar toz toz. \*

### *N̄gar tau mban̄ooᅇa to Kriᅇi titaghoᅇi*

---

\* **4:1:** 1Kor 3:5; 2Kor 6:4      \* **4:2:** Lu 12:42      \* **4:4:** Mban̄ 23:1;  
1Kor 3:13; 2Kor 10:18      \* **4:5:** Ro 2:16; 1Kor 3:8; 2Kor 5:10; Syg  
20:12

<sup>6</sup> Yam tonvetaz, saveeņ isov tane, yau nasavia iza to yau gha Apolos, leso nauul gham ve agham ngar poi pa yei tau nipaduduun gham pa Maaron aliņa ne. Yam irau agham ngar ilam tsiei. Leso yam tau apapait tamtamon ee pa ngar tooni ve matamim veleghin ite na, apul ngar tsiam tana ileple. Pa ighe agham tauvene, yam amalaan pa Maaron aliņa tau tiboode pataghaan na. \*

<sup>7</sup> Laak, yo tau upakur taum na, sei igham ghom uliiv zetamņa? Ve saa gabua ta yo ughamu ivot ila taum tapirim? Mako. Gabua tsio tisov tomania saa ngar poia tau igheen tsio, ena yo ughamu ila to Maaron. Ighe tauvene, puughu mindai ta ugham tinim ve upakur taum imin ngar tomania gabua tsio ivot ila to yo taum? \*

<sup>8</sup> Aa yam Korin, arao kat! Ail saa gabua muul? Pa yam asavsav aghe: Maaron tapiri, yam agham katini wa. Ve aghe aghazoon kat pa ngar tooni. Ve aghe yam amin kinik wa. Aleep ila tamtamon eta saamba muul mako. \* Eemon yei o, soone. Ve imin ta saveeņ tsiam tana onoon, kanan poia. Leso itiņa tamin kinik ve tagham pooz. Eemon mako. \*

<sup>9</sup> Yau naghita naghe Maaron ighur yei mbanņoonņa nileep murei geeg. Yei nimin yes tau tigher tirav zi timaat, ve tigherev zi tila pa nugh

---

\* **4:6:** Ro 12:3      \* **4:7:** Yo 3:27; Yems 1:17; 1Pe 4:10      \* **4:8:**

Saveeņ to Maaron isaav tauvene: Mboņ murei, ighe Mesia ilam ve itotoi tapiri ivot ighazoon, ene pale yesņa tamtamon tooni timin kinik ve tigham pooz pa gabua naol isov. Eemon tamtamon siriv to Korin ngar toozi ikau. Tighe yes tau tighur ila to Krisi ve tigham Maaron Avuvu tapiri na, tileep imin yes to nugh sambam gha timin kinik wa.      \* **4:8:** Syg 3:17+

to mogheraan, leso tirav zi ila eval tiina matazi. Ve yes tau timamarar ghei ne, tamtamon to taan mon mako. Yes aņela paam. \*

<sup>10</sup> Yei mbaņooņa nizuari ghei pa taghoniņ Kriši, ve tamtamon tighit ghei tighe nivaghamgham imin yes kankanooņa. Eemon yam o, aghē Kriši ighamgham arau kat pa ņgar! Yei tapirimai imbool, ve lemai ezamai mako. Eemon yam, o aghē tapirimim tintiina ve ezamim tintiina. Yam arao kat! \*

<sup>11</sup> Muuņ ve ilam, pitoool ghei ve murun ghei. Ve nonoghiņa tsiei perekperekia. Tamtamon tighamgham saghatin ghei, ve taumai lemai ruum to lepoogh mako. \*

<sup>12</sup> Yei nighamgham uraat ariaaņ pa nimamai, leso niuul taumai. Ighē tamtamon tisik saveeņ saghati payei, yei nighason Maaron to ighur poia tooni izaa toozi. Tamtamon tighurghur pataņani payei pasaa, niťagon Kriši, eemon niyooz ariaaņ ve nibaado. † \*

<sup>13</sup> Tamtamon tinťalňgal saveeņ payei, eemon yei niyol saveeņ toozi pa saveeņ poia. Tauta muuņ ve ilam, tamtamon tivelegh ghei kat ve tighit ghei tighe yei sasaghatmai imin pen ve buzbuuz to taan. \*

---

\* **4:9:** Ro 8:36; 1Kor 15:30+; 2Kor 6:4, 11:23+ \* **4:10:** Mbaņ 26:24; 1Kor 2:3; 2Kor 13:9 \* **4:11:** Mt 8:20; 2Kor 11:27 † **4:12:** Grika ve Roma tivelegh yes tau tighamgham uraat pa nimazi. Ve isaav ighe tamtamon tigham ņgar saghati pa ņeer eta, ve i iyatu mako, ene paam Grika ve Roma tiveleghi tighe i iroi ve le tapiri mako. Tauvene ņgar tau Paulus ve mbaņooņa siriv titaghoni, ene igham Grika ve Roma siriv tivelegh zi kat. \* **4:12:** Mt 5:44; Mbaņ 18:3+ \* **4:13:** 1Pe 3:9



*Paulus ipalot yes Korin ighe titaghoni pa ngar tooni*

<sup>14</sup> Saveeņ tane, yau naboode payam to napa-mayanĵin gham mako. Yau lolog igheen tsiam, ve naghit gham naghe yau natuņņa yam. Tauta naghe napaduduņ gham. \*

<sup>15</sup> Pa ighe yam lelim tamtamon ndiņndiņ ndiņndiņ (10,000) tau tiņgin gham ve tipaghazonĵai gham pa eez to Krisi, ene poia. Eemon tamamimņņa naol mako. Tamamim eemon ta yau. Pasaa, saawe tau navotia vaaru poia payam, ve aghur ila to Yesu Krisi, yau namin tamamim. \*

<sup>16</sup> Tauta naghe napalot gham, leso ataghon ngar tsiau. \*

<sup>17</sup> Puughu tane ta nambaan Timoti ilat. I, yau nanumeera ve lolog igheen tooni kat. Yau naghita imin natug duduņ. I ighur ila to Tiina toit ariaan, ve igham uraat itaghon Krisi ngar tooni. I pale ipei ngar tsiam muul pa eez tau yau naleep tunĵa ila to Krisi ve nataghon ngar tooni. Eez tane, yau napaduduņ lupuņ to Krisi pani irau nugh nugh. \*

<sup>18</sup> Yau nawatagh: Tsiam siriv matazi ingal tighe yau irau nalat naghit gham muul mako. Tauta tipakur tauzi ve tizorzoor saveeņ. <sup>19</sup> Eemon malau mako pale nalat peria tsiam, isaav ighe Tiina toit loolo tauvene. Pa naghe naghita yes tau tipapakur tauzi ve tizorzoor saveeņ na, leso nawatagh: Ti-savsav sorok, ma tigham uraat toman Maaron tapiri? <sup>20</sup> Pasaa, pooz to Maaron, ene saveeņ

---

\* **4:14:** 1Tes 2:11      \* **4:15:** Mbanĵ 18:11; 1Kor 3:5+      \* **4:16:** 1Kor 11:1; Pil 3:17, 4:9; 2Tes 3:9      \* **4:17:** Mbanĵ 19:22; Pil 2:19+

mon mako. Ene Maaron tauu tapiri to iza a to tamtamon. \*

<sup>21</sup> Mindai? Yam aghe naghham saa ngar payam? Aghe nalat tomania toon ve nalos gham, ma nalat tomania ngar marowa ve ngar to loloon pa tauun? \*

## 5

*Paulus iyaon yes Korin pa ngar to ghuruun boog*

<sup>1</sup> Aiyo, yau naghe napaduduun gham pa ngar siriv tau ivotvot ta sena. Tipaesia varumim tigde ngar saghati to ghuruun boog ivotvot ila sosomim. Ve tisaav tigde tsiam ee ivai tauu taama azaawa. Aghita. Yes kankanooŋa tau tiwatagh Maaron mako na, yes irau tigham ngar saghati tauvene mako. \*

<sup>2</sup> Eemon yam apuli gha ilepleep. Agham ngar eta pani mako. Mindai ta apakur taumim aghe yam arau kat pa Maaron ngar tooni? Imin ta yam awatagh katin ngar tooni, kanaan lolomim ipatanan pa ngar tau neer tana ighamu na, ve aziire pa lupuun tsiam. <sup>3</sup> Onoon, yau taug naleep tomani gham mako. Eemon ngar tsiau, ene ighengheen tsiam, ve Maaron Avuvu ilup ghiit le imin ta itiŋa talepleep. Neer tau igham ngar saghati tana, atuya tau pale iza a tooni, ene naghham ngar pani wa. \*

<sup>4-5</sup> Tauvene yau nasaav payam tauvene: Yam aat alup gham ila Tiina toit Yesu Krisi eeza, ve ila uraat to Maaron Avuvu, yau pale naleep tomani gham paam, ve Tiina toit Yesu tapiri iza a tsiam.

---

\* **4:20:** 1Kor 2:4+; 1Tes 1:5    \* **4:21:** 2Kor 13:10    \* **5:1:** Wkp 18:8; Ep 5:3    \* **5:3:** 2Tes 3:6; 1Tim 5:20

Mako aziir ñeer tawe pa lupuuñ tsiam, ve aghuru ila Sadan niima, ve iyamaan katin patanjani to lepoogh tauvene. Leso itoor ñgar tooni, ve ipul ñgar to lolo munğaana ileple, ve saawe to Tiina toit Yesu imuul ilam, i aat igham mulin ñeer tana, ve ileep poi. \*

*Eez to tataghon dudunjai ñgar to Pasova*

<sup>6</sup> Ñgar tsiam tau apakur taumim ve aghe arau kat pa Maaron ñgar tooni, ene poia mako. Yam awataghi mako? Yis ñgiira mon, ene irau igham uraat pa palawa tiina ve ipasaria. \*

<sup>7</sup> Tauvene asik yis tsiam munğaana isov ilale. Leso lupuuñ tsiam imin mberet paaghu tau le yis mako. Yau nawatagh: Yam amin mberet paaghu tau le yis mako na wa. Pasaa, Krisi, i imin sipsip toit to Pasova tau tiravu imaat imin watoonrau, leso ireu sosor toit. \*

<sup>8</sup> Tauvene iit aat tataghon ñgar to Pasova irau saawe. Ñgar saghati to loloon munğaana, iit aat tapuli ileple, imin yes tau tilup zi pa Pasova na, tisik yis toozi munğaana ilale. Ve tapait Maaron toman tintiniin, tagham ñgar ñgalaña mon, ve tataghon saveeñ onoon toman loloon. Leso tamin mberet paaghu tau le yis mako na, ve tataghon dudunjai ñgar to Pasova. \*

<sup>9</sup> Yau nabood rau ee ilat payam, ve nasaav payam tauvene: Yes tau tighurghur boog na, aleep soghan pazi. \*

---

\* **5:4-5:** Mt 18:18+; Kol 2:5; 1Tim 1:20      \* **5:6:** Mt 16:6+; Ga 5:9; Yems 4:16      \* **5:7:** Igham 12:3+; Yo 1:29; 1Pe 1:19      \* **5:8:** Igham 12:18+      \* **5:9:** 2Kor 6:14+; Ep 5:11; 2Tes 3:6, 14

<sup>10</sup> Saveen tsiaw tawe, ene inarui eval tiina to taan tau tighurghur boog ne mako. [Ene inarui yes tau tighur ila to Krisi ve tighamgham ngar tana.] Pa ighe yam aghe aleep soghan pa tamtamon tisov to taan tau tighurghur boog, ma matazi gabua, ma titombaan tamtamon leso tigham sorokin gabua toozi, ma tibesbees pa maaron karomņa, na yam aat apul taan tane! <sup>11</sup> Tauvene saveen tau naboode payam na, ngara tauvene: Ighe tamtamon eta isaav ighe i tonvetaz to Krisi, eemon ighurghur boog, ma maata gabua, ma ibesbees pa maaron karomņa, ma ivevelegh tamtamon ve isiksik saveen sasaghati pazi, ma ighunghun le daaba ikaukau, ma itombaan tamtamon leso igham sorokin gabua toozi, na tamtamon tauvene, agharauu sov. Aleep soghan pani. Ghanghaniin paam, yamņa alup gham sov. \*

<sup>12-13</sup> Yes tau tileep ilon ila lupuuņ to Krisi mako na, yau leg uraat to nagabiiz zi mako. Maaron tauu pale igabiiz zi. Eemon yes tau tileep ilon ila lupuuņ tooni na, iit aat tagabiiz zi pa ngar toozi.

Tauvene yam aat ataghon saveen to Maaron tane:

“Isaav ighe tamtamon saghati eta ileep ila sosomim, na yam aziire ighau.” \*

## 6

*Tapayooz tonvetaz to Krisi pa savsaveen ila daaba to taan naghozi sov*

<sup>1</sup> Isaav ighe tsiam eta iitete igham sosor pani, na puughu mindai ta i ipayooze ila yes daaba

---

\* **5:11:** Mt 18:17; Ro 16:17      \* **5:12-13:** Lo 13:5

to taan tau tiwatagh Maaron mako na naghozi? Ngar tsiam tana, mayamim pani mako? Yam awatagh: Zeran tauvene, ngar toozi iduduun ila Maaron maata mako. Tauvene yam aghur patañani tsiam ila tamtamon to Maaron nimazi to tigharaata, o poia. <sup>2-3</sup> Yam awatagh mako? Saawe to Mbonj Murei, iit tamtamon to Maaron pale tauule pa uraat to gabizoonj tamtamon to taan. Ighe tauvene, puughu mindai ta yam irau agharaat patañani ngiira ngiira tau aazne tivotvot ila sosomim ne mako? Ve iit pale tagabiiz yes anjela paam. Ighe tauvene, iit irau tagharaat patañani to taan. Pa ene gabua tiina mako. \*

<sup>4</sup> Yes daaba to taan lezi ezazi ila lupuunj to Krisi loolo mako. Puughu mindai ta yam aghurghur patañani tsiam to taan ila zeran tauvene nimazi to tigharaata? <sup>5</sup> Nabood saveenj tane payam, leso mayamim pa ngar tau aghamghamu na. Mindai, tsiam eta le ngar irau to igharaat tonjetaz to Krisi saveenj toozi mako? <sup>6-7</sup> Eemon yam ataghon eez tauvene mako. Yam apapayooz tonjetaz tsiam tau tighur ila to Krisi na, ila yes daaba to taan tau tighur ila mako na naghozi. Ngar tsiam tana itotoi ighe yam atap wa. Mindai, ighe tonjetaz tsiam eta itombaan gham to igham sorokin gabua tsiam, ma igham sosor ite paam payam, irau apul sosor tooni mako? \*

<sup>8</sup> Eemon yam ataghon eez tauvene mako. Pasaa, tonjetaz tsiam tau yamña aleep ila lupuunj to Krisi loolo na, tauta agham sosor pazi, ve atombaan zi to ayau sorokin gabua toozi.

---

\* **6:2-3:** Mt 19:28      \* **6:6-7:** Mt 5:39+; Ro 12:17+; 1Pe 3:9

<sup>9</sup> Yam awatagh mako? Isaav ighe tamtamon eta inoknok ghamuunŋ ngar tau iduduunŋ mako, i irau itaghon Maaron pooz tooni ve ilonŋ ila nugh tooni ne mako. Tauvene agham karom pa tautimim sov. Yes tau matazi saghati imin ngavuun, yes tau tibesbees pa maaron karomŋa, yes tau tighurghur boog, zitamoot tau timomogheer pa zetazŋa zitamoot siriv, <sup>10</sup> yes umbuunŋa, yes tau matazi gabua, yes ghunuunŋa, yes tau matazi izi pa zetazŋa ve tisiksik saveenŋ sasaghati pazi, ve yes tau titombaan tamtamon to tigham sorokin gabua toozi, tamtamon tisov tau tighamgham tauvene, yes aat irau titaghon pooz to Maaron ve tilonŋ tila nugh tooni ne mako. \*

<sup>11</sup> Muunŋ, yam siriv ataghon ngar tauvene paam. Eemon aazne, ila uraat to Yesu Krisi, Maaron Avuvu igham uratoi gham. Tauta Maaron igham gham angalaanŋ, ve amin tamtamon tooni patabuyaanaŋ, ve aduduunŋ ila i maata wa. \*

*Anoŋaan, ene imin Rumei to Avuvu Patabuyaanaŋ*

<sup>12</sup> Yam siriv asavsaav aghe: “Yau irau naghama ngar ta naol ne. Gabua eta le ngalsekiina mako.” Ene poia. Eemon ngar isov irau iuul ghiit mako. Ve gabua ite paam. Yau lollog pa gabua saghati eta igham pooz payau ve namin besoonŋa pani mako. \*

<sup>13</sup> Ve yam siriv asavsaav aghe: “Aniinŋ, ene gabua to apoon. Ve apoon igheen to aniinŋ izila. Ve

---

\* **6:10:** Ga 5:19+; Ep 5:5; Hib 12:14; Syg 21:8, 22:15 \* **6:11:** 1Kor 1:2; Ep 2:1+; Kol 3:7+; Tit 3:3+ \* **6:12:** Yo 8:34; 1Kor 10:23

murei, Maaron pale ipasov gabua ru tana.” \*  
 Ene onoon. Eemon anoŋaan igheen to igham ngar saghati imin nŋavuun mako. Anoŋaan igheen to ibees pa Njeer Tiina. Ve Njeer Tiina igham ngar tiina pa anoŋaan. \*

<sup>14</sup> Aghita. Maaron ipaburigin Tiina toit Yesu pa mateegh wa. Ve murei, Maaron tapiri pale ipaburigin ghiit paam pa mateegh ve igham leen anoŋaan paaghu. \*

<sup>15</sup> Yam awatagh mako? Anonamim, ene Krisi anooŋa siriv siriv. Mindai, isaav ighe tagham Krisi anooŋa sirivu ve talupu tomania livaa to eez, pale poia? Mako kat! \*

<sup>16</sup> Yam awatagh mako? Isaav ighe tamoot eta ipaak anooŋa ila livaa to eez anooŋa, ene yesuru tivalupu zi timin eemon. Saveeŋa igheen pataghaan wa:

“Yesuru pale tivalupu zi timin eemon.” \*

<sup>17</sup> Eemon tamtamon tau imin Tiina toit le na, ila uraat to Maaron Avuvu, yesuru Krisi tivalupu zi timin eemon. Mindai, tamtamon tauvene irau ilup ghi tomania livaa to eez muul? Ene aat mako. \*

---

\* **6:13:** Saveeŋ to aniiŋ ve apoon, ene iza a to zitamoot ve zilivaa anonazi. Yes eval to nugh Korin matazi saghati imin nŋavuun. Ve ngar toozi ikau tigde: Zilivaa anonazi, ene igheen to zitamoot timogheer pazi mon. Ve saa ngar tau ighe tamtamon tigham pa anonazi, ene kaut sorok. Irau igham gabua eta pa anunuzi mako. Pasaa murei, anonazi pale imaat gha ilale, ve anunuzi mon, o ileep maata yaryaare. \* **6:13:** 1Tes 4:3+ \* **6:14:** Ro 8:11; 2Kor 4:14 \* **6:15:** 1Kor 12:27; Ep 5:30 \* **6:16:** Gnp 2:24 \* **6:17:** Yo 17:21+; 1Kor 12:13; Ep 4:4

<sup>18</sup> Tauvene n̄gar to mataan saghati imin n̄gavuun, yam aleep soghan pani. Pa n̄gar tane imin sosor siriv mako. Sosor toit siriv tin̄arui tauun anon̄aan mako. Eemon tamtamon tau ighe igham n̄gar tane, ene igham sosor pa tauu anoon̄a. \*

<sup>19</sup> Yam awatagh mako? Anon̄amim, ene imin rumei to Avuvu Patabuyaanj ileep ilon̄j ila. Pasaa, Maaron igham Avuvu payam, ve aazne i ileep ila lolomim. Tauvene yam an̄gin taumim muul mako. \*

<sup>20</sup> Maaron ighol gham pa gabua tau atuya tiina kat gha amin i le wa. Tauvene saa n̄gar tau ighe aghamu pa anon̄amim, na aghamu to apaghazon̄ai Maaron eeza tiina tomania tapiri ve poia tooni. \*

## 7

### *Vain̄ n̄gara siriv*

<sup>1</sup> Aiyo, naghe nayol saveeñ siriv tau aboode ila rau tsiam na. Yam asaav tauvene: “Isaav ighe tamoot eta itut livaa eta mako, ene poia.” <sup>2</sup> Eemon n̄gar to ghuruun̄ boog, ene ivot imin tiina. Tauvene isaav ighe tamoot eta yesuru azaawa tileep soghan pa tauzi, ve tiluplup zi pa ghenoon̄j mako, ene poia mako. Poia to yesuru tilup zi. <sup>3</sup> Vaivain̄a aat titaghon vain̄ n̄gara. Isaav ighe livaa eta ighason azaawa ighe yesuru tigheen, ene tamoot aat iyok pani. Ve tamoot tauvene paam. Isaav ighe ighason azaawa ighe yesuru tigheen, ene livaa aat iyok pani. \*

---

\* **6:18:** Ep 5:3; 1Tes 4:3; Hib 13:4    \* **6:19:** Ro 14:7+; 1Kor 3:16+; 2Kor 6:16    \* **6:20:** 1Kor 7:23; Pil 1:20; Hib 9:12; 1Pe 1:18+    \* **7:3:** Igham 21:10



<sup>4</sup> Livaa iŋgin tauu anooŋa mako. Azaawa tamoot ta iŋgini. Ve tamoot tauvene paam. I iŋgin tauu anooŋa mako. Azaawa livaa ta iŋgini. <sup>5</sup> Tauvene yam vaivaiŋa aŋguruut taumim sov. Eemon isaav ighe yamru azuwam aghe asapaar pa taumim, leso apul sooso rig pa suŋuun, ene poia. Eemon murei, yamru aat avalupu gham muul. Mako pale irau atatan ghaara tsiam mako, ve Sadan iwat gham gha atap. <sup>6</sup> Saveeŋ tau nasavia pa sapaaroŋ ne, nasavia to naghamaŋgar payam mon. Ve napariaaŋa imin tutuun to ataghoni ne mako. <sup>7</sup> Yau naghe le tamtamon tisov tivai mako imin yau, o poia. Eemon Maaron ighur leen lepoogh maata maata. Tauta siriv tivai, ve siriv tivai mako. Ve saa lepoogh tau i igham pait, ene poia tooni pale igheen tomani ghiit. \*

*Saveeŋ iŋarui yes osa ve zinaara*

<sup>8</sup> Aiyo, yam osa ve zinaara, yau nasaav payam tauvene: Isaav ighe avai muul mako, ve aleep imin yau, ene poia. <sup>9</sup> Eemon isaav ighe yam irau atatan ghaara tsiam mako, na avai lak. Mako pale ghaara tsiam ipazaagh gham ve agham sosor. \*

*Vaivaiŋa irau tipul azuwazŋa mako*

<sup>10</sup> Ve yam vaivaiŋa, yau naghur tutuun tane payam: Livaa eta irau ipul azaawa ve irav motin vaiŋ tooni mako. Saveeŋ tane, ene yau taug saveeŋ tsiau mako. Ene Tiina toit tauu aliŋa. <sup>11</sup> Ve isaav ighe livaa eta ipul azaawa ve irav motin vaiŋ toozi, ene i irau ivai muul mako. Ileep mon. Ve ighe mako, i aat imuul ila pa azaawa muŋgaana, ve

---

\* 7:7: Mt 19:11+      \* 7:9: 1Tim 5:14

yesuru tilup zi muul toman lolozi eemon. Ve yes zitamoot tauvene paam. Tiziir azuwazña sov. \*

*Saveeñ siriv tau iñarui yes tau azuwazña tighur ila mako*

<sup>12</sup> Ve yam siriv tau azuwamimña tighur ila to Krisi mako na, yau nasaav payam tauvene. Isaav ighe toñvetaz eta to Krisi azaawa ighur ila mako, ve livaa iyok pa lepoogh toozi tawe, ene tamoot tana irau irav motin vaiñ toozi mako. Saveeñ tane, ene Tiina toit aliña mako. Ene yau ñgar tsiau.

<sup>13</sup> Ve isaav ighe livaa eta azaawa ighur ila to Krisi mako, ve tamoot iyok pa lepoogh toozi tawe, ene livaa tana paam irau irav motin vaiñ toozi mako.

<sup>14</sup> Pasaa, livaa ma tamoot tau ighe ighur ila, ene i imin eez pa azaawa tau ighur ila mako na, leso imin Maaron le. Imin ta mako, kanaan natmimña tisaghat ila Maaron maata. Eemon mako. Yes paam timin Maaron le. Pasaa, yam ta amin eez pazi.

<sup>15</sup> Eemon isaav ighe toñvetaz eta to Krisi azaawa ighur ila mako, ve azaawa tana ñgar tooni iyaryaan kat ighe irav motin vaiñ toozi, ene i tau ighur ila na irau iyok pani, ve ipuli ila. Ñgar tauvene, le ñgalsekiinña mako. Pasaa, Maaron ighe iit tataghon ñgar luuma. \*

<sup>16</sup> Yo livaa tau ughur ila na, uwatagh mako. Pale umin eez pa azuwam tamoot ve Maaron igham mulini. Ve yo tamoot tauvene paam. Uwatagh mako. Pale umin eez pa azuwam livaa, ve Maaron igham mulini. \*

---

\* **7:11:** Mal 2:16; Mt 5:32, 19:3+; Mk 10:11+      \* **7:15:** Ro 12:18, 14:19      \* **7:16:** 1Pe 3:1

*Saa lepoogh tau Maaron igham pait, ene loloon poia pani mon*

<sup>17</sup> Saa lepoogh tau Tiina toit ighuru pait, ene loloon poia pani mon. Tauvene lepoghaan tau taghamu indeen saawe tau Maaron ipoi ghiit tamin i le na, tayok pani mon. Saveen tane, yau napaduduun lupuun to Krisi pani irau nugh nugh.

<sup>18</sup> Tauvene isaav ighe neer eta tirav waaro, ve murei Maaron ipoi imin le, ene neer tana iil eez to tigharaat tiini sov. Ve isaav ighe tamoot eta tirav waaro mako ve Maaron ipoi imin le, ene igham ngar pa tirav waaro sov. <sup>19</sup> Pa isaav ighe tirav waroon, ma tirav waroon mako, ene kaut sorok. Ve ngar to taghoniin Maaron tutuun tooni, ene gabua tauu. \*

<sup>20</sup> Tauvene saa lepoogh tau tamtamon enaena tighamu indeen saawe tau Maaron ipoi zi timin le na, yes aat lolozu poia pani ve tileep tauvene.

<sup>21</sup> Isaav ighe yo besoonja sorok, ve Maaron ipoi ghom umin le, na lolom ipatanjan pa uraat tsio sov. Eemon isaav ighe eez eta ivot to upas taum pa uraat tsio tana, ene poia. Utaghoni mon. <sup>22</sup> Pa ighe tamtamon eta imin besoonja sorok, ve Tiina toit ipoi, ene tamtamon tana imin besoonja muul mako. Onoon, uraat to besoonja, i pale ighamu. Eemon Krisi ipasu pa saghati tapiri tau muun ikisi na, ve i imin Krisi le wa. Ve tamtamon tau ighe i besoonja mako ve ingin tauu, ve Krisi ipoi imin le, ene i besoonja to Krisi. \*

<sup>23</sup> Aghita. Maaron ighol gham pa gabua tiina gha amin i le wa. Tauvene amin besoonja pa ngar to

---

\* **7:19:** Ro 2:25; Ga 5:6, 6:15      \* **7:22:** Yo 8:36; Ga 3:28; Kol 3:24;  
1Pe 2:16

tamtamon sov. \*

<sup>24</sup> Tauvene yam tonvetaz, saa lepoogh tau iit enjaena taghamu indeen saawe tau Maaron ipoi ghiit tamin le na, iit aat tapaak ila to Maaron ve tataghoni tauvene mon gha ila.

*Saveen injarui yes tau tivai soone*

<sup>25</sup> Yau leg saveen siriv pa yes tau tivai soone. Saveen tane, ene tutuun tau Tiina toit isavia ne mako. Ene yau taug ngar tsiau. Eemon Tiina toit igham poghani ghau, ve igham leg ngar. Tauvene yam irau aghur ila saveen tsiau tane, ve ataghoni.

<sup>26</sup> Aazne, iit taleep ila saawe to patanani. Tauvene yau naghita naghe: Saa lepoogh tau aazne iit enjaena taghamu, ene poia to taleep tauvene mon gha ila. <sup>27</sup> Tauvene isaav ighe yo uvai wa, na uil eez to urav motin vainj tsiam ve uziir azuwam sov. Uleep tomania azuwam tana. Ve isaav ighe uvai soone, na uzuari ghom pa vainj sov. <sup>28</sup> Eemon isaav ighe uvai, ene poia paam. Ugham sosor mako. Ve zilivaa mbiwa tauvene paam. Isaav ighe tivai, ene tisor mako. Eemon yau nawatagh: Lepoogh to vaivainja, yes pale tindeen patanani naol. Ve lolog pa patanani tauvene igham gham sov. Tauta nasavia saveen tane payam.

*Tagham ngar tiina pa gabua to taan sov*

<sup>29</sup> Yam tonvetaz, saveen tsiau tane, puughu tauvene. Saawe ilam igharau wa. Tauvene aazne ve ila, tagham ngar tiina pa lepoogh toit to taan sov. Tauvene vaivainja zitamoot, yes aat tileep imin yes tau lezi azuwazna mako. \*

\* **7:23:** 1Kor 6:20; 1Pe 1:18+

\* **7:29:** Ro 13:11+; 1Kor 10:11; 1Pe

<sup>30</sup> Ve yes tau lolozi ipataŋan na, yes aat tileep imin yes tau lolozi ipataŋan mako. Ve yes tau lolozi poia na, yes aat tileep imin yes tau lolozi poia mako. Ve yes tau tigholghol lezi gabua na, yes aat tigham ŋgar tauvene: Gabua tawe, ene to tauzi, leso tikisi igheen malau mako. <sup>31</sup> Ve yes tau tighamgham uratoi gabua to taan na, ŋgar toozi isaghav gabua tawe geeg sov. Pa iit tawatagh: Taan tane tomania ŋgara, ene irau igheen le alok mako. Ighe isov tane.  
\*

<sup>32</sup> Yau naghe patanani naol to taan igham lolomim bubu ve agham ŋgar naol sov. Tauta nasavia saveeŋ tane. Neer mbiu tau ighe ighur ila to Krisi, i ighamgham ŋgar tiina pa Tiina toit ve uraat tooni, ve izuari ghi ighe le igham Krisi loolo poia. <sup>33</sup> Eemon neer vaivaiŋ, i ighamgham ŋgar naol pa gabua to taan, ve izuari ghi ighe le igham azaawa loolo poia. \*

<sup>34</sup> Tauvene ŋgar tooni imin ru. Ve yes zinaara ve zilivaa mbiwa tau tighur ila to Krisi na, tauvene paam. Tighamgham ŋgar pa Tiina toit ve uraat tooni, ve tizuari zi tigde le tighur ŋgar toozi ve lolozi, tomania anoŋazi isov imin i le kat. Eemon zilivaa vaivaiŋa, tighamgham ŋgar naol pa gabua to taan, ve tizuari zi to tigham azuwazŋa lolozi poia. \*

<sup>35</sup> Saveeŋ tsiau tane, nasavia to nangalsekin gham pa vaiŋ mako. Ene nasavia to nauul gham, leso gabua eta to taan ireu ŋgar tsiam sov, ve apul taumim kat pa Tiina toit ve uraat tooni, ve ataghon

---

\* **7:31:** 2Pe 3:11+; 1Yo 2:15+; Syg 21:1      \* **7:33:** Lu 14:20

\* **7:34:** 1Tim 5:5

ngar duduunja mon ila i maata. <sup>36</sup> Isaav ighe njeer eta igham ngar ighe i irau ivai mako, \* eemon murei maata ingal ighe ngar tau igham pa livaa tau tisiigho pani na, ene iduduun mako, ve ngar tooni iyaryaaj ighe i aat ivaii, ene poia to itaghon ngar tooni, ve yesuru tivai. Ene sosor mako. <sup>37</sup> Eemon isaav ighe njeer eta loolo iyaryaaj ighe ivai mako, ve irau itatan ghaara tooni, ve ighe tamtamon eta ingalsekini pa vaij mako, ve i itaghon tauu loolo ve ivai mako, ene igham ngar poia. <sup>38</sup> Tauvene njeer tau ighe ivai, ene igham ngar poia. Ve njeer tau ighe ivai mako, ene igham ngar poia kat. \*

<sup>39</sup> Isaav ighe livaa vaivaij eta azaawa ileep maata yaryaare, ene livaa tana irau irav motin vaij toozi mako. I aat ileep tomania azaawa. Ve isaav ighe murei azaawa imaat, ve livaa tana ighe ivai muul, ene poia. I igham sosor eta mako. Eemon ivai sorok sov. I aat ighita le njeer eta tau ighur ila to Tiina toit, o ivaii. \*

<sup>40</sup> Eemon yau naghita naghe: Yes zinaara tau tivai muul mako, ve tileep sorok na, yes pale tintinzi

---

\* **7:36:** Tamtamon siriv to Korin aat tigham ngar tigde ngar to vaij, ene poia geeg ila Maaron maata mako. Tauta Paulus ibood saveej tane. Ngara siriv, matazi ingal tigde saveej tane injarui Korin siriv tau tiyokia natuzlivanja pa vaij mako. Ve ngara siriv, matazi ingal tigde saveej tane injarui zeran siriv tau tisiigh zilivaa pazi, eemon yes rekia tivai zi mako. Tauvene zilivaa tawe tisanjan tisanjan le ndaman toozi izala wa. Ve ngara siriv, matazi ingal tigde saveej tane injarui tamtamon siriv tau tivai, eemon yesja azuwazja tiluplup zi pa ghenoon mako. Pasaa, tiroi: Isaav ighe yesja azuwazja tivalupu zi pa ghenoon, ene pale ipoon zi pa Maaron. \* **7:38:** Hib 13:4 \* **7:39:** Ro 7:2+; 2Kor 6:14

ve poia tiina to Maaron iza toozi iliiv yes tau tivai muul na. Saveeñ tane, yau naghita naghe Maaron Avuvu igham pooz payau ve nasavia.

## 8

*Paulus isavia watoonrau tau tamtamon tigham zi pa maaron karomña*

<sup>1</sup> Aiyo, naghe nasaav rig pa gabua tau tigham zi timin watoonrau pa maaron karomña na.

Yam siriv asavsaav aghe: “Yei nisov lemai ngar. Nikankaan pa gabua tawe ngara mako.” Ene poia. Eemon ayamaan gham. Pa ngar toit, ene igham ghiit tapakur tauun ve taghe taliiv zetaanña siriv. Eemon ngar to loloon pa tauun, ene igham ghiit tail eez to tauul zetaanña ve tapalot zi. \*

<sup>2</sup> Isaav ighe tamtamon eta igham ngar ighe i irau kat pa ngar, ene itotoi ighe i igham ngar irao soone. \*

<sup>3</sup> Eemon isaav ighe tamtamon eta loolo igheen to Maaron, ene Maaron iwataghi, ve ighamu imin le wa.

<sup>4</sup> Aiyo, yam aghason ghau aghe irau taghan gabua tau tirav zi imin watoonrau pa maaron karomña na, ma mako?

Iit tawatagh: Maaron karomña ta naol ne, ene Maaron tauu mako. Ene gabua anunuzi sorok. Pasaa, Maaron eemon ta ilepleep. Ite paam mako. \*

<sup>5</sup> Onoon, tamtamon tighur ila to gabua maata maata to sambam saamba ve taan, ve tiwaat zi

---

\* **8:1:** Mbanj 15:20; Ro 14:3      \* **8:2:** 1Kor 3:18, 13:12; Ga 6:3

\* **8:4:** 1Kor 10:19+; Ga 4:8; Ep 4:5+

tighe ‘maaron toozi’ ve ‘tiina toozi.’ <sup>6</sup> Eemon iit taghur ila to Maaron eemon. I Tamaan tau imin puughu pa gabua tisov, ve iit taleep to tabees pani. Ve taghur ila to Tiina toit eemon. Ene Yesu Krisi. I ta imin eez pa gabua tisov tivot, ve i ta imin puughu pa lepoogh toit. \*

<sup>7</sup> Eemon tamtamon siriv tau ghuruuñ ila toozi iyaryaan soone na, tighilaal gabua tane mako. Pasaa, muuñ ve ilam, tibesbees pa maaron karomña. Tauvene aazne, isaav ighe tighan gabua eta tau tighamu imin watoonrau pa maaron karom eta, ene tiyamaan tauzi tighe tigham sosor ve tisaghat ila Maaron maata. \* \*

<sup>8</sup> Onoon, gabua ta naol ne, isaav ighe taghan zi, ma taghan zi mako, ene irau igham ghiit tagharau Maaron, ma ipoon ghiit pani ne mako. Pa gabua tauvene irau igham ghiit tamin popoiaan, ma tasaghat ila Maaron maata ne mako. \*

<sup>9</sup> Eemon yam tau aghazoon pa gabua tane, ve awatagh aghe Maaron ingalsekin ghiit pa ghaniin gabua eta mako na, ayamaan gham. Pa ighe aghan gabua tauvene, ene pale agherev yes tau ghuruuñ ila toozi iyaryaan soone na, gha titap pa ghuruuñ ila toozi. \*

---

\* **8:6:** Yo 1:3+; Mbanj 17:28; Ro 11:36; Kol 1:16 \* **8:7:** Saawe tau yes matazi dodoli tigham watoonrau, zeran to watoonrau tirav gabua tawe, ve timoz miiza sirivu izala artaal ilonñ ila rumei to maaron karom tawe. Ve sirivu, ene yes tau tila pa sunuun na, tighamu tivot tila muuri, ve timozi gha yesña zetazña siriv tighani, ma tighamu ila nugh to gholgholiin, leso tamtamon tigholi. \* **8:7:** Ro 14:23; 1Kor 10:28+ \* **8:8:** Mk 7:19; Ro 14:14 \* **8:9:** Ro 14:13+; Ga 5:13



<sup>10</sup> Yo tau ughazoon pa Maaron ngar tooni na, isaav ighe ughan ilonj ila rumei to maaron karom eta, ene poia. Eemon ighe neer eta tau ghuruunj ila tooni iyaryaanj soone ve iroiroy pa ghaniinj gabua tauvena, ighit ghom, ene aat ipazaagha to ighan gabua tawe paam. Tauvene murei, i pale iyamaan ighe i igham sosor ila Maaron maata. <sup>11</sup> Uyamaan ghom wa? Neer tau ghuruunj ila tooni iyaryaanj soone ve iroiroy pa ghaniinj gabua tauvene, i tonjvetaz tsio tau Krisi imaat pani. Eemon ngar tau ughamu na, ene ivaghamunia. <sup>12</sup> Yam aat matamim injal tonjvetaz tsiam siriv tau ghuruunj ila toozi iyaryaanj soone na. Isaav ighe agham zi tiyamaan tigde tigham sosor, ve lolozi ipatanjan, ene yam agham sosor pazi, ve agham sosor pa Krisi paam. <sup>13</sup> Tauvene isaav ighe gabua eta tau taghani irau igham tonjvetaz tsiau eta to Krisi itap pa ghuruunj ila tooni, ene irau naghan gabua tana muul mako. Pa aat naghama tonjvetaz tsiau tana itap ma vene. \*

## 9

*Puughu tau Paulus izor atuya tau yes Korin tigde tigham pani na*

<sup>1</sup> Yau tane, tamtamon eta injin ghau mako. Yau nanjin taug. Ve ezag pa uraat to mbanjoonja, ve naghita katin Tiina toit Yesu. Ve uraat tau naghama toman Tiina toit tapiri na, anoonja tooni, ene lupuunj tsiam. Yam Korin aghilaal gabua naol tane, ma mako? \*

---

\* **8:13:** Ro 14:19+      \* **9:1:** Mbanj 9:3+; 1Kor 3:5, 4:15

<sup>2</sup> Onoon, tamtamon siriv tighita tigde yau mbanjoona tauu to Krisi mako. Eemon yam, o awatagh. Pasaa, uraat tau naghamu ila sosomim ve ighur anoonja ivot, tauta ipaghazonjai ghau ighe yau mbanjoona tauu to Tiina toit.

<sup>3</sup> Yes tau tigabiiz ghau tigde yau mbanjoona tauu mako na, yau nayol saveenj toozi tauvene:  
<sup>4</sup> Mindai, yei tau nighamgham uraat to Tiina toit ne, lemai ezamai to nigham aniiñ ve yaa imin uraat tsiei atuya, ma mako? \*

<sup>5</sup> Onoon, yei uraata siriv nivai mako. Ve imin ta nivai ve azuwamaija tighur ila, kanan irau nigham zi ve yeja nilaghlaagh pa uraat to Krisi imin Petrus tomania mbanjoona siriv ve Tiina toit tazja tighamghamu. <sup>6</sup> Ma mindai, yam aghe yeiru Banabas mon nigham uraat pa nimamai, leso ni-uul taumai pa lepoogh tsiei, ve yes siriv mako?

<sup>7</sup> Agham ngar pa yes zaaba. Toozi eta iil le maet ve aniiñ to inñin tauu pa lepoogh tooni? Mako. Ve isaav ighe tamtamon eta ivazogh vaen, pale tauu irau ighan anoonja mako? Mako. I pale ighan. Ve mindai, nginiñ to sipsip ve mekmek irau igham tuz toozi ve ighunu, ma mako? \*

<sup>8-9</sup> Mindai, saveenj tsiau tane, yau nasavia itaghon ngar to tamtamon? Mako. Pasaa, tutuun to Mose isavia saveenj raraate tauvene:

“Isaav ighe bapolo ighamgham uraat pa vaghazon wit leso uuli imolav, na upoon aavo sov. I paam irau ighan siriv.” \*

Mindai, Maaron igham ngar pa bapolo mon ve

---

\* **9:4:** Lu 10:8    \* **9:7:** 2Tim 2:6    \* **9:8-9:** Lo 25:4; 1Tim 5:17+

ighur tutuun tane? <sup>10</sup> Mako. I isavia saveen tane injarui ghiit paam. Aghita. Yes tau timbut taan pa vazoghiin aniiñ, ve yes tau tindou wit ve tigham uraat pa walavoon uuli na, yes irau tighur matazi tige murei pale uum taama ighur lezi abuzi. Puughu tane ta tibood tutuun tane pait. <sup>11</sup> Saawe tau nigham uraat ila sosomim, yei nivazogh uuv popoia to Avuvu Patabuyaañ. Tauvene isaav ighe yam apamuul gabua siriv to auul ghei pa lepoogh tsiei, ene iduduun. Ma mindai? Aghita aghe yei nighur matamai payam pa gabua tiina eta? \*

<sup>12</sup> Zeran siriv, yam aghit zi aghe yes lezi ezazi to tigham uleen ilat tsiam. Ene poia. Ngar tana iduduun. Eemon yei, o iduduun kat to nigham uleen siriv ilat tsiam.

Eemon muun ve ilam, yei niyok payam to auul ghei mako. Pa aat ipoon eez pa vaaru poia to Krisi. Onoon, eez tau nitaghoni pa uraat tsiei, ene igham patañani payei. Eemon saa patañani tau ighe ivot payei, yei irau nibaado. \*

<sup>13</sup> Yam awatagh mako? Yes tau tighamgham uraat ila Rumei to Maaron loolo na, tighanghan aniiñ to rumei. Ve isaav ighe tamtamon tigham gabua eta imin watoonrau, ene tighur gabua tana sirivu izala artaal imin watoonrau, ve sirivu izi pa yes tau tighamgham uratoi watoonrau na, leso tighani. \*

<sup>14</sup> Yes tau tivovotia vaaru poia na, tauvene paam. Tiina toit ighur tutuun pait ighe: Yes aat tigham

---

\* **9:11:** Ro 15:27; Ga 6:6      \* **9:12:** Mban 20:33+; 2Kor 11:7+; 1Tes 2:9      \* **9:13:** Wkp 6:16, 26; Lo 18:1

lezi atuya pa uraat toozi to votiaan vaaru poia. Leso iuul zi pa lepoogh toozi. \*

<sup>15</sup> Tauvene yau leg ezag to naghams leg atuya pa uraat tsiau. Eemon muun ve ilam, nayok pa ngar tauvene mako. Ve aazne paam, nabood saveen tane to napaburigin gham, lesa agham leg atuya ne mako. Lolog pa ngar tauvene mako kat! Pasaa, eez tau nataghoni pa uraat tsiau, tauta napakur ghau pani. Tauvene saawe tau naleep matag yaryaare, irau nayok payam to agham leg uleen eta ne mako. Aleep, namaat nala, o saa ngar tau aghe aghamu, na aghamu lak! \*

<sup>16</sup> Isaav ighe yau navotia vaaru poia, ene leg pu-ughu eta to napakur taug ne mako. Pasaa, Maaron tauu ighur uraat tane ila nimag. Tauvene yau aat naghams. Isaav ighe navotia vaaru poia mako, ene yau nakaria taug. \*

<sup>17</sup> Ve imin ta naghams uraat tane itaghon taug lolog, kanan naghams ngar pa leg atuya. Eemon mako. Pasaa, namin besoonja to Maaron, ve i inumeer ghau ve ighur uraat tane ila nimag. \*

<sup>18</sup> Tauvene saa ta pale naghams imin leg atuya? Atuya tsiau, ene vene: Saawe tau navotia vaaru poia pa tamtamon, yau napoi pa atuya tau ezag pani ne mako. Naghams uraat pazi sorok. Ve ngar tane, ta igham ghau tintinig ve lolog poia. Atuya tsiau, tauta ene.

*Paulus itaghon tamtamon gabuazi, lesa igherev zi timin Krisi le*

---

\* **9:14:** Lu 10:7; 1Tim 5:17+      \* **9:15:** Mbanj 18:3, 20:34; 2Kor 11:10      \* **9:16:** Yer 20:9; Mbanj 26:16+; Ro 1:14+      \* **9:17:** 1Kor 4:1; Ga 2:7; Kol 1:25

19 Yau tane, tamtamon eta ingin ghau mako. Nanjin taug. Eemon taug lolog ve namin besoonja pa tamtamon tisov, lesu nagherv tamtamon katiini timin Krisi le. \*

20 Tauvene saawe tau naleep tomania yes Yuda, yau nataghon zi pa gabuazi, lesu nagherv zi timin Krisi le. Onoon, yau naleep ila tutuun toozi saamba mako. Eemon saawe tau naleep tomani zi, naleep imin yes tau tileep ila tutuun saamba na, lesu nagherv zi timin Krisi le. \*

21 Ve saawe tau naleep tomania nugh nugh tau tikankaan pa tutuun to yes Yuda na, yau nataghon gabuazi, ve naleep imin yes tau tikankaan pa tutuun tawe. Pasaa, naghe le nagherv zi paam timin Krisi le. Eemon yau nazoor tutuun to Maaron mako. Pasaa, yau naleep ila tutuun to Krisi saamba. 22 Isaav ighe naleep tomania yes tau ghuruun ila toozi iyaryaan soone, yau nataghon zi pa gabuazi ve lepoogh toozi. Lesu napaburigin ghuruun ila toozi ve tileep tunja ila to Krisi. Tauvene yau nataghon tamtamon tisov gabuazi ve lepoogh toozi, lesu naghham mulin tamtamon toozi siriv. Saa eez tau irau iuul zi, ene yau nataghooni. \*

23 Tauvene ngar isov tau naghhamgham zi ne, ene to vaaru poia ilaan irau tamtamon tisov. Lesu yenja nighita poia to Maaron iza tsiei.

*Mataan pirik parak pa parlosaan to Maaron*

24 Iit tawatagh: Isaav ighe parlosaan eta ivot, ene yes to landoon pale tisov tilaan. Ve tamta-

---

\* **9:19:** Mt 20:26+; Ga 5:13    \* **9:20:** Mban 16:3, 21:26    \* **9:22:** Ro 15:1+; 1Kor 10:33

mon toozi eemon, ta pale ilaan le iliiv zeetņa ve igham le atuya. Tauvene matamim pirik parak pa parlosaan to Maaron, ve alaan toman tapirimim. Leso aliiv ve agham lemim atuya poia. \*

<sup>25</sup> Tamtamon tisov tau tigde tilaan pa parlosaan eta na, tisapaar poi pa gabua maata maata. Leso tilaan toman tapirizi. Ve atuya tau tizuzuari zi pani na, ene igheen malau mako. Rekia mon ve isaghat. Eemon iit, o tazuari ghiit pa atuya poia tau pale igheen le alok. Irau isaghat mako. \*

<sup>26</sup> Yau namin tamtamon tau ilanlaan ve maata ilala ilamlam ne mako. Yau matag iduduun pa nugh tau landoon ila isov pani na, ve nalaan ŋaruini. Ve yau namin ŋeer tau iparav ve isiksik niima soroksorok ne mako. Yau namin ŋeer tau isik niima, ve irav katin tamtamon. <sup>27</sup> Yau naravrav katin taug anonag, lesa natatan ŋgar sasaghati to lolog munğaana. Pa naroi. Ige navotia Maaron aliinja pa tamtamon, ve ŋgar tsiau siriv isosor, ene pale murei tigham atuya tsiau ila pa tamtamon ite, ve taug naleep sorok. \*

## 10

*Isaav ighe tagham sosor, Maaron pale ighur atuya pait imin muun igham pa yes Israela*

<sup>1</sup> Yam tonvetaz, yau naghe matamim ingal gabua tau muun ivot pa timbuunņa na. Saawe tau yesņa Mose tipul Isip, Maaron igham taitai ivot lesa ipoon zi ve itotoi eez pazi. Ve yes tisov tileep ila

---

\* **9:24:** Pil 2:16, 3:14; 2Tim 4:7+; Hib 12:1      \* **9:25:** 1Tim 6:12; 2Tim 2:5; Yems 1:12; 1Pe 1:4, 5:4      \* **9:27:** Ro 13:14; Pil 3:13+; Kol 3:5

taitai tawe saamba, ve tisov timbut Te Siŋsiŋai ve tila tivoon pa ziige ite. \*

<sup>2</sup> Taitai ve te tawe ŋgara, ene imin yes Israela tigham yaa. Pasaa, saawe tana ve ila, yes titaghon Mose pa ŋgar tooni ve tigham lepoogh paaghu.

<sup>3-4</sup> Ve aniin ve yaa tau Maaron Avuvu igham pazi na, yes tisov tighan ve tighun. Yaa tawe ivotvot ila maet to Maaron Avuvu tau itataghon zi pa laghoon toozi. Maet tawe, ene Kriŋi. \*

<sup>5</sup> Eemon murei, tamtamon toozi katini tizoor Maaron aliin̄a. Tauta aate yavyav pazi ve irav zi timatmaat izi nugh ŋginaan̄a. \* \*

<sup>6</sup> Gabua tau ivot pa yes Israela pa saawe tana, ene imin totoyaan̄ pait. Leso taghilaal, ve loloon ighaar pa gabua sasaghati imin yes sov. \*

<sup>7</sup> Tauvene yam abees pa maaron karom̄a imin muun̄ yes Israela siriv tighamu na sov. Pa saveen̄ to Maaron isaav tauvene: [Saawe tau yes Israela tigharaat makau pa gol, ve tipait gabua tawe imin maaron toozi.]

“Eval tiina mbolezi izi pa ghanghaniin̄ ma ghunghunuun̄, ra tipaburigin mogheraan̄ tomania ŋgar sasaghati naol.” \*

---

\* **10:1:** Igham 13:21, 14:22+ \* **10:3-4:** Igham 16:14, 17:1+; Nam

20:1+ \* **10:5:** Tamtamon siriv to Korin tigham ŋgar tauvene: Yes tigham yaa wa, ve tighan̄han̄ pasa. Tauvene isaav ighe timalaan̄ pa tutuun̄ to Maaron, ene kaut sorok. Pasaa, yaa tau tighamu, tomania pasa tau tighan̄hani na pale igharaat zi ila Maaron maata. Eemon Paulus isaav pa yes Korin ighe tinumeer yaa ve pasa geeg sov. Pa Maaron irau ighur zi mako. Isaav ighe tizoor aliin̄a, i pale ivaghamun̄ zi raraate imin muun̄ ivaghamunia timbuz̄n̄a.

\* **10:5:** Nam 14:29+; Hib 3:17+; Jud 5 \* **10:6:** Nam 11:4; Mbo

106:14 \* **10:7:** Igham 32:6

<sup>8</sup> Ve mataan saghati imin ngavuun sov. Pa Israela siriv tigham tauvene, ve tamtamon toozi 23,000 timatmaat pa aaz eemon. \*

<sup>9</sup> Ve tatoov Tiina toit tapiri sov. Pa muuŋ, Israela siriv tigham tauvene, ve moot sasaghati tivot ve tighan zi gha timatmaat. \*

<sup>10</sup> Ve tayau avoon pa Maaron tomania uraata tooni sov. Pa muuŋ, Israela siriv tigham tauvene, ve aŋela tau iravrav tamtamon na, irav zi timatmaat. \*

<sup>11</sup> Gabua isov tau ivot pa yes Israela pa saawe tana, ene imin totoyaŋ pait. Tibood sinaiŋ to gabua tawe to ipaduduŋ iit tau aazne tazaa pa saawe to Maaron ighe ipasov gabua naol isov, leso tagharaat tauun. Mako pale patanani igham ghiit imin muuŋ igham yes Israela. \*

<sup>12</sup> Tauvene isaav ighe tamtamon eta inumeer tauu ighe i iyooz tunja, i aat iyamaan ghi. Mako pale itap. \*

<sup>13</sup> Tovaan tau ivotvot payam na, maata ite paam mako. Tovaan tsiam ta naol ne, raratezi imin tovaan tau monmon ivotvot pa tamtamon tisov. Ve yam irau anumeer Maaron. Pasaa, tovaan tau yam irau abaado mako, ene i irau ipuli ivot payam mako. Ve isaav ighe ipul tovaan eta ivot payam, i pale ighur lemim eez eta to apaghau taumim pani. Leso ayooz ariaan ve aliiv tovaan tana. \*

*Taleep soghan pa maaron karomŋa tomania*

---

\* **10:8:** Nam 25:1+; Mbo 106:29; Syg 2:14    \* **10:9:** Igham 17:2-7; Nam 21:5+; Mbo 95:9    \* **10:10:** Nam 14:2-37    \* **10:11:** Ro 13:11; 1Pe 4:7    \* **10:12:** Ro 11:20    \* **10:13:** 1Kor 1:9; 1Tes 5:24; 2Pe 2:9



*rumei toozi*

<sup>14</sup> Tauvene yam zeran tsiau, ngar to tabees pa maaron karomņa, agharauu sov. Aleep soghan pani. \*

<sup>15</sup> Yam lemim ngar. Tauvene taumim irau agabiiz saveņ tau naghe nasavia ne. <sup>16</sup> Saawe tau taghun vaen ila rubruub, ve tapait Maaron pa poia tooni, ene igham ghiit tapaak Kriši ve siņ tooni imin leen. Ve mberet tau tateeva ve taghani na, tauvene paam. Ene igham ghiit tapaak Kriši ve miiza imin leen. \*

<sup>17</sup> Ve mberet eemon tau iit tasov taghani, tauta itotoi ighe iit tasov tamin ņeer eemon anooņa. Ene Kriši. \*

<sup>18</sup> Ve matamim iņgal ngar tau yes Israela titaghoni pa watoonrau toozi. Isaav ighe tigham gabua eta imin watoonrau, ene timoz sirivu izala artaal, ve tauzi tighan sirivu, leso yesņa Maaron tivalupu zi timin eemon. \*

<sup>19</sup> Ighe tauvene, pale tasaav mindai pa maaron karomņa ve watoonrau tau tamtamon tighamgham pazi na? Ene gabua tauu? Mako. Maaron toit mon ta Maaron tauu. \*

<sup>20</sup> Watoonrau tau yes matazi dodoli tighamgham zi ila rumei toozi loolo na, ene tigham zi pa Maaron tauu mako. Tigham zi pa avuvu sasaghati. Tauvene yau naghe yam apaak zi pa ngar toozi tawe sov. Pa ighe apaak zi, ene imin yamņa avuvu sasaghati tawe avalupu gham amin eemon. \*

---

\* **10:14:** Mbaņ 15:20; 2Kor 6:16+; 1Yo 5:21      \* **10:16:** Mk 14:22+

\* **10:17:** Yo 6:33+; Ro 12:5; 1Kor 12:13, 27      \* **10:18:** Wkp 7:15

\* **10:19:** 1Kor 8:4+      \* **10:20:** Lo 32:17; Syg 9:20

21 Aloon. Yam irau aghun ila rubruub to Tiina toit, ve rubruub to avuvu sasaghati paam ne mako. Ve yam irau aghan ila boor to Tiina toit, ve aghan ila boor to avuvu sasaghati paam ne mako. \*

22 Isaav ighe iit tagham tauvene, ene pale tagham Neer Tiina aate yavyav kat. Pasaa, ngar tooni iyaryaaj ighe taghur loloon ve ngar toit isov ila pani mon. Yam tau aghanhan ve aghunghun ila rumei to maaron karomja na, agham ngar mindai? Aghe tapiriin iliiv Maaron? \*

*Iit aat tagham ngar tau iuul zetaanja ve ipait Maaron eeza*

23 Tsiyam siriv tisaav tigde: “Yei irau nigham ngar naol isov. Gabua eta le ngalsekiija mako.” Ene onoon. Eemon ngar isov irau iuul ghiit mako. Ve ngar isov irau ipalot ghiit mako. \*

24 Iit irau tagham ngar pa tauun mon mako. Iit aat tagham ngar pa zetaanja paam, ve tatoova to tauul zi ve tapalot zi pa ghuruun ila toozi. \*

25 Tauvene yam aat ataghon ngar tane: Isaav ighe aghita gabua eta miiza igheen ila nugh to gholgholiin, na aghason sov. Agholi ve aghani mon. Agham ngar naol sov. \*

26 Pasaa, Maaron aliija isaav ighe:

“Taan tomania gabua tisov tau tileep ve tigheen ila, ene to Neer Tiina.” \*

27 Ve isaav ighe tamtamon eta ighur ila to Kriisi mako, ve isain gham ighe yamja aghanhan ve

---

\* **10:21:** 2Kor 6:15+ \* **10:22:** Lo 32:21; Mbo 78:58 \* **10:23:** 1Kor 6:12 \* **10:24:** Ro 15:1+; 1Kor 13:5; Pil 2:4+ \* **10:25:** 1Tim 4:4 \* **10:26:** Mbo 24:1

lolomim aghe ala, ene poia. Ala lak. Ve saa aniin tau ighe tigham payam, na aghani mon. Aghason zi pani sov. Pa ighe tipaes payam tighe gabua tana ilam pa rumei to maaron karom eta, ve aghan gabua tana, ene pale agham n̄gar aghe asosor ila Maaron maata. \*

<sup>28</sup> Eemon isaav ighe tamtamon eta ipaes payam ighe gabua miiza tana, ene watoon̄rau sirivu, na yam aghani sov. Pa ighe aghani, ene pale tamtamon tana ighita ighe yam agham sosor, ve i igham n̄gar naol. \*

<sup>29</sup> Onoon, isaav ighe aghan gabua tana, ene pale taumim ayamaan aghe agham sosor ila Maaron maata mako. Eemon yam aat agham n̄gar pa etamim tana. Isaav ighe ighit gham aghan gabua tana, i pale ighita ighe yam agham sosor ve igham n̄gar naol. Eemon isaav ighe tamtamon eta isavia saveeñ tauvene pait mako, iit irau tataghon tauun gabizoon̄ toit pa saa n̄gar ta poia ve saghati. Puughu mindai ta nataghon gabizoon̄ to n̄eer ite? \*

<sup>30</sup> Isaav ighe yau naghan gabua tana toman lolog poia pa Maaron, puughu mindai ta tamtamon ite iyau aavo payau? \*

<sup>31</sup> Tauvene isaav ighe yam aghan, ma aghun, ma agham saa n̄gar ite paam, ene poia. Eemon saa n̄gar tau aghamu, yam aat aghamu to apait Maaron eeza, ve apaghazon̄ai tapiri ve poia tooni. \*

<sup>32</sup> Tauvene yam irau agham n̄gar pa yes Yuda, ve yes Grika tau tighur ila mako na, ve lupuun̄ to

\* **10:27:** Lu 10:7+      \* **10:28:** 1Kor 8:7+      \* **10:29:** Ro 14:14+

\* **10:30:** Ro 14:6; 1Tim 4:3+      \* **10:31:** Kol 3:17; 1Pe 4:11

Maaron paam. Agham ngar eta to ireu ngar toozi sov. Agham ngar tau iduduun mon ila tamtamon tisov matazi. \*

<sup>33</sup> Leso ataghon ngar tsiau. Aghita. Yau naghham ngar pa taug mako. Saawe isov, natoova to naghham ngar tau popoia mon ila tamtamon tisov matazi. Ve naghham ngar tau pale iuul zi, lesu Maaron igham mulin zi. \*

## 11

<sup>1</sup> Tauvene yam irau ataghon ghau pa ngar tsiau, imin yau nataghon Krisi pa ngar tooni. \*

*Tagharaat tauun mindai pa saawe to suruun?*

<sup>2</sup> Yau napait gham pa ngar tsiam tau saawe isov matamim ingalngal ghau, ve akis Maaron aliinja tau nasavia payam na ariaan. Saveen tana, yau naghhamu ila to tamtamon siriv, ve anag nasakia ilat payam. \*

<sup>3</sup> Ve aazne, naghe yam awatagh kat tauvene: Krisi, i imin daaba pa zitamoot tisov, ve zitamoot timin daaba pa azuwazna. Ve Maaron ta imin daaba pa Krisi. \*

<sup>4</sup> Isaav ighe tamoot eta ipoon daaba pa gabua eta, ve isun ma ivotia Maaron aliinja pa tamtamon imin propet, ene ipamayanin daaba tooni, ene Krisi. <sup>5</sup> Ve zilivaa tau tipoon dabazi mako, ve

---

\* **10:32:** Ro 14:13+; 1Kor 8:13; 2Kor 6:3      \* **10:33:** Ro 15:2; 1Kor 9:19+      \* **11:1:** 1Kor 4:16+; Pil 3:17; 2Tes 3:7+      \* **11:2:** 2Tes 2:15; 2Tim 1:13+      \* **11:3:** Gnp 3:16; Ep 1:22, 5:23; 1Pe 3:1, 5

tisuŋ ma tivotia Maaron aliinŋa imin propet, ene yes tipamayanin daaba toozi, ene azuwazŋa. \*

Zilivaa tauvene, ene raratezi imin zilivaa sasaghati tau tiin dabazi, lesu tipamayanin zi.

<sup>6</sup> Tauvene isaav ighe livaa eta ipakur ghi ve ipoon daaba mako, ene poia to tiin daaba. Lesu maaya pa ngar tau i ighamu na ve ipuli. Ve isaav ighe livaa eta maaya pa tikot daaba raua izi, ma tiin daaba, ene i aat ipoon daaba.

<sup>7</sup> Eemon zitamoot irau tipoon dabazi mako. Pasaa, yes tigham Maaron naagho, ve tileep to tipakur Maaron eeza pa tapiri ve poia tooni. Ve zilivaa tileep to tipakur azuwazŋa. \*

<sup>8</sup> Aghita. Muuŋ geeg, tamoot ivot ila to livaa mako. Livaa ivot ila to tamoot. <sup>9</sup> Ve Maaron igham ngar pa livaa ve ighur tamoot ne mako. I igham ngar pa tamoot, tauta ighur livaa to iuule. \*

<sup>10</sup> Puughu tane ta yes zilivaa irau tipoon dabazi. Lesu titotoi tauzi tighe yes tileep ila azuwazŋa sambazi, ve ngar toozi iduduun ila yes aŋela matazi. †

<sup>11</sup> Eemon iit zilivaa ve zitamoot tau tapaak Tiina toit Krisi na, irau taleep leen leen mako. Pasaa,

---

\* **11:5:** Yes Korin ngar toozi tauvene: Isaav ighe zilivaa tipoon dabazi, ene itotoi zi ighe yes zilivaa popoiazi tau tileep ila azuwazŋa sambazi. Ve ighe livaa eta ipoon daaba mako, ene itotoia ighe i nasolo tinazi, ve loolo pa ileep ila azaawa saamba mako. Grika tinazi lezi eez ru to tipoon dabazi. Ee, ene tigud uuli sirivu izala dabazi imin awedu. Ve ite, ene tipul dabazi raua itum tiina, ve timbuula ve tipoosa izala dabazi. \* **11:7:** Gnp 1:26+ \* **11:9:** Gnp 2:18+; 1Tim 2:13 † **11:10:** Saawe tau iit talup ghiit pa suŋuun, yes aŋela tilepleep tomani ghiit paam. Ughita Epesus 3:10 ve 1Pet 1:12.

zitamoot ve zilivaa irau tivaule zi. <sup>12</sup> Agham ngar pa Adam gha Eva. Imin maata, livaa ivot ila to tamoot. Ve aazne, zitamoot tivotvot ila to zilivaa. Pasaa, zilivaa ta tipoop zi. Eemon Maaron ta imin puughu pa gabua isov. <sup>13</sup> Yam taumim irau agabiiz gabua tane. Isaav ighe alup gham pa suṅuṅ, ve livaa eta ipoon daaba mako, ve isuṅ pa Maaron, ene iduduṅ? <sup>14</sup> Saveeṅ tsiau tane, ene itaghon iit gabuaan paam. Isaav ighe ṅeer eta daaba raua tiina, ene taghita taghe ṅeer tana ipamayanṅin tauu. <sup>15</sup> Ve isaav ighe livaa eta daaba raua tiina, ene ighamu paghuuna ila tamtamon matazi ve tipakuru. Daaba raua tawe, ene Maaron igham pani, leso ipoon daaba. <sup>16</sup> Isaav ighe tamtamon eta izoor aliṅag tane, ene nasaav pani tauvene: Yei lemai ngar ite paam pa gabua tane mako. Ve yei mon mako. Lupuṅ tisov to Maaron titaghon ngar eemon pa gabua tane.

*Yes Korin tivaghamunia ngar to ghaniin pasa*

<sup>17</sup> Aiyo, naghe napaduduṅ gham pa ngar tsiam siriv tau iduduṅ mako. Irau napait gham mako. Pasaa, saawe tau alup gham pa suṅuṅ, suṅuṅ tsiam iuul gham mako. Ivavaghamun gham.

<sup>18</sup> Saveeṅ tau naghe nasavia payam imin maata, ene vene: Yau naloṅ varumim tigha saawe tau alup gham pa ghanghaniin ve suṅuṅ na, yam avavalaghi gham ila ṅgun ṅgun, ve avavazorai gham pa savsaveeṅ. Ve naghe saveeṅ tane, ene aat onoon.\*

<sup>19</sup> Ngar tsiam tau avavalaghi gham, ene poia mako. Eemon ngar tauvene aat ivot. Leso tawatagh: Sei

---

\* **11:18:** 1Kor 1:10, 3:3

ta Krisi tamtamon tooni ve ngar tooni iduduun ila i maata. \*

<sup>20</sup> Saawe tau alup gham pa sunjuun, yam ataghon ghanghaniin to Tiina toit ngara mako. <sup>21</sup> Pasaa, yam agham ngar pa zeetmimnja ve asaan zi mako. Yam siriv matamim ghanghani, ve amuun ala agham lemim gha aghan. Ve tamtamon tsiam siriv tighun tiina le tisaghat. Tauta zeetmimnja siriv tau tilam murei na, lezi aniin mako ve pitool zi. <sup>22</sup> Mindai, irau aghan ve aghun izi taumim ruum tsiam mako? Ma aghe avelegh lupuun to Maaron ve apamayanjin zeetmimnja siriv tau mbolaanja na? Pale nasaav mindai payam? Aghe napait gham pa ngar tsiam tana? Mako kat! \*

*Paulus ipit saveen to pasa muul  
(Mt 26:26+; Mk 14:22+; Lu 22:17+)*

<sup>23</sup> Saveen tau naghamu ila to Tiina toit ve muun nasavia payam, tauta aazne nayoli muul. Saveen tauvene: Mbon tau Yudas ighur Yesu ila koinja nimazi, Yesu igham mberet, <sup>24</sup> ve ipait Maaron pani. Ra iteva ve isaav ighes: “Ene yau mizag. Yau aat napul taug ve namaat payam. Ngar tau naghamu ne, matamim kisini ve ataghoni, lesa matamim ingal ghau.” <sup>25</sup> Tighan le isov, ra itaghon ngar raraate pa rubruub vaen. Ighamu ve isaav pazi ighes: “Rubruub tane, ene sinjig tau pale imalin ve ipariaan saveen mbuaan to eez paaghu tau pale Maaron yesna tamtamon tooni tivalupu zi timin eemon. Saawe isov tau ighes yam aghun ila

---

\* **11:19:** 1Yo 2:19      \* **11:22:** Yems 2:5+

rubruub tane, ataghon ngar tau yau naghamu ne, leso matamim ingal ghau.” \*

<sup>26</sup> Saveej tane, ngara tauvene: Saawe isov tau aghan mberet tana ve aghun ila rubruub vaen na, avotia mateegh to Tiina toit. Yam aat agham tauvene ila ila le irau muleej tooni.

<sup>27</sup> Tauvene tamtamon tau ighe ighan mberet ve ighun ila rubruub to Tiina toit, ve igham ngar tau iduduuj pa pasa ngara mako, ‡

ene i igham sosor pa Tiina toit miiza ve siiji.

<sup>28</sup> Tauvene tamtamon aat tigabiiz poghania tauzi, o tighan mberet tana ve tighun ila rubruub. \*

<sup>29</sup> Pasaa, mberet ve vaen, ene izaa to Tiina toit anooja. Tauvene ighe tamtamon eta ighilaal gabua tane mako, ve ighani ma ighunu imin gabua sorok, ene igham sosor. Tamtamon tauvene, Maaron pale ighur atuya pani. <sup>30</sup> Puughu tane ta tamtamon tsiam katini timomoroon ve tapirizi imbool. Ve siriv, timaat wa. <sup>31</sup> Ve imin ta tagabiiz tauun poi ve taghan pasa, kanan Maaron irau ighur atuya tauvene pait mako. <sup>32</sup> Eemon isaav ighe i igabiiz ghiit ighe tagham sosor, ve ilos ghiit to ipaduduuj ghiit, ene poia. Mako pale takis ngar saghati toit, ve saawe to Mbonj Murei, i ighur atuya pait, ve itinja eval tiina to taan talaleen. \*

<sup>33</sup> Tauvene yam tonvetaz tsiau, isaav ighe alup gham pa ghanghaniinj ve sunjuuj, na asanjaan zeet-

---

\* **11:25:** Igham 24:3+; Hib 8:8, 9:15+ ‡ **11:27:** Yes Korin tigham ngar naol tau iduduuj pa pasa ngara mako. Pasaa, saawe tau tighan pasa, yes tilup lolozi imin eemon mako. Tivelegh zetaznja siriv tau mbolaanja na, ve tivavalaghi zi tileep lez lez. \* **11:28:** 2Kor 13:5

\* **11:32:** Mbo 94:12+; 2Kor 7:10; Hib 12:7+; Syg 3:19



mimnja le yam asov aghan raraate. <sup>34</sup> Ve ighe tamtamon eta pitool matini, ene poia to ighan pataghaan izi ruum tooni. Le isov, o ila pa lupuun tsiam. Leso saawe tau alup gham, agham sosor ila Maaron maata sov, ve i ighur atuya payam sov. Yau leg saveen siriv ighengheen soone. Eemon irau nasavia aazne mako. Taug nalat peria, o nasavia.

## 12

*Maaron Avuvu irei uraat ve ngar maata maata pait*

<sup>1</sup> Yam tonvetaz, uraat ve ngar maata maata tau Maaron Avuvu irei zi pait ne, yau naghe yam akankaan pazi sov.

<sup>2</sup> Matamim injal imuul ila pa muun, saawe tau yam akankaan pa Maaron. Saawe tana, tighegherev gham ala ve asunsun pa maaron karonja tau lezi avozi mako. \*

<sup>3</sup> Tauvene yau naghe nasaav ghazonja payam: Tamtamon tau Maaron Avuvu ighamgham pooz pani na, i irau isik saveen saghati injarui Yesu mako. Ve tamtamon eta irau isaav sorok ighe Yesu, i Tiina toit, ne mako. Maaron Avuvu igham pooz pani, o isaav tauvene toman loolo. \*

<sup>4</sup> Maaron Avuvu ireirei uraat ve ngar maata maata pait. Uraat ve ngar isov tawe, ene Avuvu eemon ta imin puughu pazi. \*

<sup>5</sup> Besoon toit itaghon eez maata maata. Eemon tasov tabees pa Tiina eemon, ene Yesu. <sup>6</sup> Ve

\* **12:2:** Mbo 115:4+; 1Tes 1:9      \* **12:3:** Mt 16:17; 1Yo 4:2+

\* **12:4:** Ro 12:6+; Ep 4:11+; Hib 2:4

Maaron eemon ta ighamgham uratoy iit tasov, ve ipapalot ghiit, tauta taghamgham uraat maata maata ila i tauu tapiri.

<sup>7</sup> Maaron Avuvu ileep tomania iit tasov, ve ireirei tauu tapiri tomania uraat ve n̄gar maata maata irau ghiit, leso tapalot lupuuŋ to Krisi pani.  
\*

<sup>8</sup> Tamtamon ee, Maaron Avuvu ipaghazon̄aini pa Maaron n̄gar tooni, leso ivotia n̄gar tawe pa tamtamon. Ve ite, Maaron Avuvu igham le n̄gar popoia siriv, leso ipaduduun̄ tamtamon pani. <sup>9</sup> Ve ite, Maaron Avuvu eemon tawe ipalot ghuruun̄ ila tooni le iyaryaŋ kat. Ve ite, Maaron Avuvu igham le tapiri to iuul yes moroghoon̄a ve tinizi poia. \*

<sup>10</sup> Ve ite, i le tapiri to igham gabua n̄geretazi. Ve ite, i ivotia Maaron aliin̄a pa tamtamon imin propet. Ve ite, i irau ighilaal gabua tau ivotvot ne: Maaron Avuvu imin puughu pani, ma avuvu ite paam? Ve ite, Maaron Avuvu ipaburigini gha isavia saveeŋ imin kaolaŋ tau tamtamon tiloon̄a, eemon tikankaan pa puughu. Ve n̄eer ite, Maaron Avuvu ipaghazon̄aini pa saveeŋ tawe puughu, leso ivotia pa tamtamon ve tighazon̄on̄ pani. \*

<sup>11</sup> N̄gar ve uraat isov tana, Avuvu eemon ta imin puughu pazi. I ireirei zi irau iit en̄aen̄a itaghon tauu loolo. \*

*Iit tau taleep ila lupuuŋ to Krisi na, tamin Krisi anoon̄a siriv siriv*

---

\* **12:7:** 1Kor 14:26; 1Pe 4:10+      \* **12:9:** Mk 16:17+; 1Kor 13:2; Yems 5:14      \* **12:10:** Ro 12:6; 1Kor 13:1-2, 14:2+      \* **12:11:** Hib 2:4

<sup>12</sup> Iit tawatagh: Anonjaan, ene eemon. Ve i le gabuaanja katini imin nimaan, agheen, mataan, ve gabua siriv paam. Eemon anonjaan gabuaanja tisov, ene tilup zi timin gabua eemon. Lupuuñ to Krisi, ene ngara raraate mon. \*

<sup>13</sup> Pasaa, iit tamtamon maata maata. Siriv, yes Yuda, siriv Grika. Siriv, besooja. Ve siriv, besooja mako, tingin tauzi. Eemon saawe tau tagham yaa, ila uraat to Maaron Avuvu eemon, iit tamin Krisi le. Ve Avuvu tawe ta ilup ghiit tamin Krisi anooja eemon. Ve Maaron igham Avuvu eemon pa iit tasov. Avuvu tawe imin yaa maata yaryaare pait ve ipapalot ghiit. \*

<sup>14</sup> Iit tawatagh: Anonjaan, gabuaanja eemon mako. I le gabuaanja katini. <sup>15</sup> Aghita. Isaav ighe tamtamon eta aaghe igham ngar tauvene: “Ighe yau namin ñeer tane niima, kanan poia. Eemon mako. Tauta irau napaak anooja mako.” Pale irau ipul niia, ve ila ileep soghan? Mako. Pasaa, i ñeer tana anooja sirivu. <sup>16</sup> Ve isaav ighe ñeer tana taliija igham ngar ighe: “Ighe yau namin ñeer tane maata, kanan poia. Eemon mako. Tauta irau napaak anooja mako.” Pale irau ipul niia, ve ila ileep soghan? Mako. Pasaa, i ñeer tana anooja sirivu. <sup>17</sup> Ve mindai? Isaav ighe anonjaan gabuaanja tisov titoor zi timin mataan mon, pale irau taloon saveen? Ma ighe titoor zi timin taliijaan mon, pale irau tanuñuz gabua vaazi? Mako.

<sup>18</sup> Iit anonjaan vene mako. Maaron itaghon tauu loolo, ve ighur anonjaan gabuaanja ta naol ne, lesu tighamuur uraat toz toz. <sup>19</sup> Aghita.

---

\* **12:12:** Ro 12:4+; 1Kor 10:17      \* **12:13:** Yo 7:37+; Ga 3:28; Kol 3:11

Isaav ighe anonaan gabuaana tisorv titoor zi timin gabuaana eta mon, pale taghita taghe ene tamtamon anona? Mako. <sup>20</sup> Anonaan, i le gabuaana katini. Ve gabuaana tisorv tilup zi timin gabua eemon. \*

<sup>21</sup> Tauvene mataan irau ivelegh nimaan ve isaav ighe: “Ah, yau leg uraat eta payo mako!” Vene mako. Ve dabaan tauvene paam. Irau isaav tauvene pa agheen mako. Pasaa, anonaan gabuaana tisorv, lezi uraat. <sup>22</sup> Ve agham ngar pa gabua siriv tau tighen ila loloon ne imin ateen ve kodkodaan. Onoon, taghita gabua tawe taghe arianaazi mako. Eemon lezi uraat tintiina. Ighe tighen mako, ene pale tamaat. <sup>23</sup> Anonaan gabuaana siriv tau taghe poia to tamtamon tighit zi mako ve mamayaan pazi ne, ene tapakur zi. Pasaa, monmon mataan ingalngal zi, ve taponpoon zi. <sup>24</sup> Eemon anonaan gabuaana siriv tau popoia to tamtamon tighit zi na, tagham ngar tauvene pazi mako. Tapul zi tighen sorok. Maaron ta ighur anonaan gabuaana ta naol ne, ve ilup zi timin eemon. Ve anonaan gabuaana siriv tau taghit zi taghe gabua sorok ve lezi ezazi mako ne, i ipakur zi tiliiv anonaan gabuaana siriv. <sup>25</sup> Maaron igham tauvene, lesa anonaan gabuaana tivazorai zi ve tivavalaghi zi sov. I ighe tilup zi timin eemon, ve tirarar poi pa tauzi ve tivaule zi. \*

<sup>26</sup> Iit tawatagh: Isaav ighe anonaan gabuaana eta iyamaan yavyavuun, ene pale anonaan isov

---

\* **12:20:** Saveen tau Paulus isavia pa anonaan, ene izaaz to lupuun to Krisi. Pasaa, Maaron Avuvu ilup Krisi tamtamon tooni timin eemon, ve ireirei uraat ve ngar maata maata irau zi, lesa tipalot lupuun to Krisi. \* **12:25:** 1Kor 1:10-12

iyamaan yavyavuun. Ve ighe tipait anooaan gabuaaŋa eta, ene pale anooaan gabuaaŋa tisov lolozi poia ve tintinizi.

<sup>27</sup> Lupuun tsiame, ene imin Krisi anooa. Ve yame enaena amin anooa tana gabuaaŋa siriv siriv. \*

<sup>28</sup> Lupuun to Krisi, Maaron ighur yes mbaŋooŋa to timuun pani, mako yes tau timin propet ve tivotia Maaron aliŋa pa tamtamon. Ve imin tol pani, ene yes tau tipaduduun tamtamon pa Maaron aliŋa. Mako yes tau tighamgham gabua ngeretazi, ve yes tau Maaron irei tapiri pazi lesu tiuul moroghoona, ve yes tau tighamgham uraat pa uleen zetazŋa, ve yes tau lezi ngar pa nginiŋ uraat, ve yes tau Maaron Avuvu ipaburigin zi gha tisavia saveen imin kaolaan. \*

<sup>29</sup> Mindai? Tamtamon tisov timin mbaŋooŋa to Krisi? Ma tisov timin propet ve tivotia Maaron aliŋa pa tamtamon? Ma tisov tipaduduun tamtamon pa Maaron aliŋa? Ma tisov irau to tigham gabua ngeretazi? <sup>30</sup> Ma Maaron irei tapiri pa tamtamon tisov lesu tiuul moroghoona? Ma Maaron Avuvu ipaburigin tamtamon tisov to tisavia saveen imin kaolaan? Ma tisov irau to tivotia saveen kaolaan tawe puughu? Mako. <sup>31</sup> Tauvene Maaron Avuvu irei uraat ve ngar maata maata pait. Ve yame aat azuari gham to agham uraat ve ngar tau iuul katin lupuun to Krisi. Aiyo, naghe nasavia ngar ee tau poia kat iliiv ngar ta naol ne. \*

---

\* **12:27:** Ro 12:5+      \* **12:28:** Ep 2:20, 4:11+      \* **12:31:** 1Kor 14:1

# 13

## *Ngar to loloon pa tamtamon, ene iliiv ngar isov*

<sup>1</sup> Isaav ighe yau irau nasaav ila nugh nugh aliñazi, ma anjela aliñazi, eemon lolog pa tamtamon mako, ene yau namin belo ma ambam tau itañ sorok toman aliñña tiina. <sup>2</sup> Ve isaav ighe navotia Maaron aliñña pa tamtamon imin propet, ve naghazonñ pa ngar tooni yonñaanña isov, ve nawatagh katin ngar popoia isov, ve ghuruunñ ila tsiau iyaryaanñ kat irau to nasaav ve loloz tighau tila pa ziige ite, ene poia. Eemon isaav ighe lolog pa tamtamon mako, ene yau namin gabua sorok. \*

<sup>3</sup> Ve isaav ighe narei gabua tsiau naol isov pa yes mbolaanña, ve napul taug ila Maaron koiñña nimazi ve tighur ghau nala yav ighan ghau, eemon lolog pa tamtamon mako, pale naghham saa imin leg atuya? Mako.

<sup>4</sup> Ngar to loloon pa tamtamon, ene vene: Tagham poghania tamtamon. Ve isaav ighe tamtamon tigham patañani pait, ene pale tayai ghiit, ve tabaado mon. Ve ighe taghita zetaanña lezi gabua katini, ene irau ireu loloon mako. Ve irau tapait tauun ve taghe taliiv zetaanña mako. \*

<sup>5</sup> Ve tagham ngar eta isosor ila tamtamon matazi mako, ve mataan inñgal tauun mon mako. Ve ateen yavyav soroksorok mako, ve mataan kisin sosor to tamtamon mako. \*

---

\* **13:2:** Mt 17:20; 1Kor 12:8, 28    \* **13:4:** 1Pe 4:8    \* **13:5:** Ro 13:10; 1Kor 10:24, 33; Pil 2:4

<sup>6</sup> Ve ŋgar tau ighe iduduunj mako na, ene pale tintiniin pani mako. Ve saa saveeŋ ma ŋgar tau onoon, ene pale loloon poia pani. \*

<sup>7</sup> Ve saa ŋgar tau ighe ivot, ene gabua eta irau igham ghiit taghur muriin pa tamtamon mako. Saawe isov, iit pale tanumeer Maaron, ve taghur ila ariaaŋ taghe i pale igham gabua isov ivot poi. Ve saa patañani tau ighe ivot pait, ene pale tayooz ariaaŋ ve tabaado. \*

<sup>8</sup> Ŋgar to loloon pa tamtamon irau isov mako. Ighengheen irau saawe. Eemon ŋgar to voti-aan Maaron aliija imin propet, ene murei pale Maaron ipasovu. Ve ŋgar tau Maaron Avuvu ipaburigin ghiit gha tasavia saveeŋ imin kao-laan, ene pale isov. Ve uraat tau Maaron Avuvu ighamghamu leso ipaghazonjai ghiit pa ŋgar siriv, ene paam pale isov. <sup>9</sup> Aghita. Iit tagham ŋgar irao soone. Ve Maaron aliija tau tavotia pa tamtamon imin propet na, tauvene paam. Tasavia siriv siriv mon. \*

<sup>10</sup> Ve tala tala le ighe saawe to gabua tauu ivot, ene pale Maaron ipasov gabua isov tau aazne taghamgham siriv siriv ne. \*

<sup>11</sup> Muunj, saawe tau yau kukuag, saveeŋ tomania ŋgar ve gabizoonj tsiau, ene ŋgaala imin to yes geegeu. Eemon aazne, namin olman gha ŋgar tsiau imatuugh wa. Tauta napul ŋgar to geegeu

---

\* **13:6:** Mbo 15:2+; Ro 12:9; 1Pe 1:22; 3Yo 3-4 \* **13:7:** Ro 15:1; Ga 6:2; 2Tim 2:24 \* **13:9:** 1Kor 8:2+ \* **13:10:** Ep 4:13; Pil 3:12

ileple. \* \*

<sup>12</sup> Aazne, iit taghita gabua to Maaron ighazoon geeg mako. Ene imin taghita gabua tawe anunuzi ila natiloŋa. Eemon murei, itiŋa Maaron pale tavaghito ghiit. Aazne, yau naghām ŋgar siriv mon. Ve murei pale nawatagh kat, imin Maaron iwatagh katin ghau. \*

<sup>13</sup> Tauvene ŋgar tintiina tol ta tighengheen: ŋgar to ghuruuŋ ila, ŋgar to ghuruuŋ mataan pa Maaron, ve ŋgar to loloon pa Maaron ve tamtamon. Ve ŋgar tol tane, ŋgar tau imuuŋ, ene ŋgar to loloon pa Maaron ve tamtamon. \*

## 14

*Ŋgar to votiaaŋ Maaron aliiŋa imin propet, ene iliiv ŋgar to tasavia saveeŋ imin kaolaan*

<sup>1</sup> Tauvene yam azuari gham pa ŋgar to loloon pa Maaron ve tamtamon, tomania ŋgar ve uraat isov tau Maaron Avuvu irei zi pait ne. Ve ŋgar ee tau yam aat azuari gham pani kat, ene ŋgar to tavotia Maaron aliiŋa pa tamtamon imin propet.

<sup>2</sup> Pasaa, yes tau Maaron Avuvu ipaburigin zi gha tisavia saveeŋ tau tamtamon tilooŋa imin kaolaan na, tisavsaav pa tamtamon mako. Tisavsaav pa Maaron. Ve saveeŋ tau tisavia na, ene puughu

---

\* **13:11:** Paulus isavia saveeŋ tane iza to tauu. Eemon saveeŋ tane iŋarui yes Korin. Pasaa, ŋgar tau yes tighamghamu na, ene itotoi zi ighe ŋgar toozi imatuugh soone (1Kor 3:1). Paulus ighita ighe ŋgar to loloon pa Maaron ve tamtamon, ene gabua tiina kat. Iliiv ŋgar ta naol ne. Eemon yes Korin titaghon ŋgar tauvene irao soone. \* **13:11:** 1Kor 3:1 \* **13:12:** 2Kor 3:18; 1Yo 3:2; Syg 22:4 \* **13:13:** Kol 1:4+; 1Tes 1:3, 5:8; 1Yo 4:16



iyoon. Tauta tamtamon tiloonja ve tikankan panii.  
<sup>3</sup> Eemon yes tau tivotia Maaron aliiija imin propet na, tisavia saveen tau tamtamon irau tiloonja ve tighazon panii. Tauta tipalot zetazja ve tiseen ngar toozi, ve tirav atezi leso lolozi poia, ve tipari-aan zi to titaghon ngar poia. <sup>4</sup> Tamtamon tau Maaron Avuvu ipaburiginii gha isavia saveen imin kaolaan na, i ipalot eval tiina mako. Ipalot tauu mon. Ve isaav ighe neer eta ivotia Maaron aliiija imin propet, ene i ipalot yam asov tau alep ila lupuuñ to Krisi na, ve iseen ngar tsiam.

<sup>5</sup> Yau naghe Maaron Avuvu ipaburigin yam asov gha asavia saveen imin kaolaan, o poia. Eemon ighe yam asov avotia Maaron aliiija imin propet, ene pale poia kat. Tauvene isaav ighe tamtamon eta isavia saveen imin kaolaan, na i aat ivotia saveen tana puughu paam. Leso ipalot lupuuñ to Krisi, ve iseen ngar toozi. Ve ighe mako, ene ngar to votiaan Maaron aliiija imin propet ta poia kat iliiv ngar to tasavia saveen imin kaolaan.\*

<sup>6</sup> Yam tonvetaz, isaav ighe yau nalat ve nasavia saveen imin kaolaan, ene pale nauul gham mindai? Mako. Yau aat navotia gabua siriv tau Maaron ipaghazonjai ghau panii, ma naseen ngar tsiam pa ngar siriv, ma napaduduun gham pa ngar siriv, ma navotia Maaron aliiija payam imin propet, o nauul gham. Pa ighe nasavia saveen tauvene, yam aat aghazon pa puughu. <sup>7</sup> Agham ngar pa gabua siriv tau tigharaat zi gha titan, imin pirai ve gita. Gabua tawe, tauzi irau titan mako. Taviv zi, ma tarav zi, o titan. Eemon isaav ighe

---

\* 14:5: Nam 11:26-29

titaņ poi mako, ene pale tawatagh mbouņ aliņa mindai? <sup>8</sup> Ve tavuur tau tivivu pa malmal na paam, ighe itaņ poi mako, ene pale sei igharaat ghi pa malmal? <sup>9</sup> Yam tauvene paam. Isaav ighe asavia saveeņ imin kaolaan tau tamtamon tighazonņ pani mako, ene pale tigham ņgar pa saveeņ puughu mindai? Mako. Saveeņ tsiam pale imin yaghur. <sup>10</sup> Onoon, tamtamon tau tileep izi taan ne, aliņazi ite ite. Ve aliņazi tawe, tISOV lezi pughuzi. Tauvene sei tau ighe iwatagh nugh eta aliņazi, ene aat ighazonņ pani. <sup>11</sup> Eemon isaav ighe tamtamon eta isavsaaV, ve yau nawatagh aliņa mako, ene pale yeiru nivaghito ghei imin i to nugh ite, ve yau to nugh ite. <sup>12</sup> Yam tauvene paam. Aazne, azuari gham pa uraat ve ņgar maata maata tau Maaron Avuvu irei zi pait ne. Ene poia. Eemon yam aat azuari gham kat pa uraat ve ņgar tau ipapalot lupuņ to KriSi.

<sup>13</sup> Tauvene isaav ighe Maaron Avuvu ipaburigin tamtamon eta gha isavia saveeņ imin kaolaan, ene i aat ighason Maaron to iuule pa toraan saveeņ tawe. Leso zeetņa tiloņa ve tighazonņ pani. <sup>14</sup> Isaav ighe nasuņ ila saveeņ imin kaolaan, ene Maaron Avuvu tau ileep ila lolog, tauta isavsaaV. Eemon saveeņ tau nasavia ne iuul ņgar tsiau mako. <sup>15</sup> Tauvene pale naghham mindai? Yau aat nalup rugharu. Saawe siriv tau nasuņ, Avuvu tau ileep ila lolog ne, isavsaaV. Ve saawe siriv, nasuņ ve ņgar tsiau ighazonņ pa saveeņ tau nasavia ne. Ve saawe siriv tau nambou mbouņ to sunuņ, Avuvu tau igheen ila lolog ne, imbou. Ve saawe siriv, nambou ve ņgar tsiau ighazonņ pa

mbouŋ tau nambouia ne. \*

<sup>16</sup> Aghita. Isaav ighe tamtamon eta ilat ilup tomani gham pa suŋuun, ve Maaron Avuvu ipaburigin ghom ve upait Maaron pa poia tooni toman lolom poia, ve tamtamon tana ikankaan pa saveeŋ tsio puughu, ene pale iyok pani ighe: “Onoon” mindai? Mako. Pa saveeŋ tau yo usavia na, i ikankaan pa puughu. <sup>17</sup> Onoon, yo usavia saveeŋ poia ve upait Maaron pa poia tooni. Eemon saveeŋ tsio irau ipalot tamtamon tana mako.

<sup>18</sup> Yau lolog poia pa Maaron ve napakuru pasaa, nasavia saveeŋ imin kaolaan le naliiv gham asov.

<sup>19</sup> Eemon saawe tau naleep tomania Maaron tamtamon tooni pa suŋuun, yau naghe nasavia saveeŋ tau tamtamon tisov irau tilooŋa ve tighazooŋ pani. Isaav ighe nasavia saveeŋ ziiri liim mon tau tamtamon tighazooŋ pazi, ene poia ve iliiv saveeŋ ziiri ndiŋndiŋ ndiŋndiŋ (10,000) tau tamtamon tikankaan pazi. <sup>20</sup> Yam tonvetaz, agham ŋgar imin yes geegeu muul sov. Yam amin zolman wa. Tauvene yam aat agham ŋgar matuugha imin yes zolman. Eemon ŋgar saghati, yam aleep soghan pani, imin yes geegeu tau tighunghun tuz. \*

<sup>21</sup> Maaron aliŋa isaav ighe: Muun, Maaron aate yavyav pa yes Israela, ve isaav pazi ighe:

“Yau aat naghama zeran to nugh ite tau aliŋazi ite na, tilam ve tiŋgin tamtamon tsiau tane, ve navotia aliŋag pazi ila zeran tawe avozi. Eemon aliŋag tau tisavia ne, yes Israela pale tilooŋa mako.” \*

---

\* **14:15:** Ep 5:19; Kol 3:16      \* **14:20:** Ro 16:19+; 1Kor 3:1; Ep 4:14+; Hib 5:12+      \* **14:21:** Is 28:11+

<sup>22</sup> Saveeᅇ tane ipaghazonᅇai ghiit ighe ᅇgar to tasavia saveeᅇ imin kaolaanᅇ, ene imin ilaal pa yes tau tighur ila ne mako. Ene imin ilaal pa yes tau tighur ila mako na, leso ipaburigin ᅇgar toozi pa Maaron. Ve ᅇgar to votiaanᅇ Maaron aliiᅇa imin propet, ene imin ilaal pa yes tau tighur ila soone ne mako. Ene imin ilaal pa yes tau tighur ila na, leso tighilaal tighe Maaron ileep tomani zi.

<sup>23</sup> Aghita. Isaav ighe alup gham pa suᅇuᅇuᅇ, ve yam asov asavia saveeᅇ imin kaolaanᅇ, ve ighe tamtamon siriv tau tighur ila soone ve tikankan pa Maaron na, tilat tomani gham pa suᅇuᅇuᅇ, ene pale tighit gham tighe yam avaghamgham imin boraunᅇa! <sup>24</sup> Eemon isaav ighe tamtamon tauvene ilonᅇ ilat, ve iloonᅇ yam asov avotia Maaron aliiᅇa imin propet, ve asavia saveeᅇ tau i ighazonᅇ pani, ene pale saveeᅇ tsiam iᅇgali, ve ighamu ighilaal sosor tooni ve atuya tau pale izaa tooni. \*

<sup>25</sup> Tamtamon tana pale iyamaan ighe ᅇgar isov tau iyoonᅇ ila loolo na, yam asavia ivot ighazonᅇ wa. Tauvene i pale itap izi taan, ve ipait Maaron eeza, ve isaav ighe: “Onoon kat, Maaron ilepleep tomani gham.”

### *Eez to suᅇuᅇuᅇ ilaan duduᅇuᅇ*

<sup>26</sup> Tauvene yam tonᅇvetaz, pale tasaav mindai? Saawe tau alup gham pa suᅇuᅇuᅇ, na yam asov agham uraat le irau gham. Neer ee, i imbou mbounᅇ to ipakur Maaron. Ve ite, i ipaduduᅇuᅇ gham pa Maaron aliiᅇa. Ve ite, i isavia ᅇgar yonᅇgaanᅇa siriv tau Maaron ipaghazonᅇaini pani na. Ve ite, i isavia saveeᅇ imin kaolaanᅇ. Ve ite, i ivotia saveeᅇ tana

---

\* **14:24:** Yo 16:8; Mbanᅇ 2:13

puughu payam. Ve saa ŋgar tau yam aghe aghamu, yam aat aghamu to apalot lupuun to Krisi. \*

<sup>27</sup> Isaav ighe Maaron Avuvu ipaburigin tamtamon gha tisavia saveeŋ imin kaolaan, na eval irau tisaav mako. Tamtamon ru ma tol, ene irau. Ve saawe tau aghe asaav, na yam aat asaan zeet-mimŋa. Tamtamon ee isavsaav le isov, o tamtamon ite aana. Ve tamtamon eta aat ivotia saveeŋ toozi puughu. Leso eval tiina tighazoŋ pani.

<sup>28</sup> Ve isaav ighe tamtamon eta irau ivotia saveeŋ tawe puughu mako, ene irau tisaav aliŋazi tiina ila lupuun to Krisi mako. Tineneeŋ mon, ve tisavsaav toman Maaron ila lolozi.

<sup>29</sup> Yes tau tivotia Maaron aliŋa imin propet na, tauvene paam. Tamtamon ru, ma tol tisavsaav le isov, o yam siriv agabiiz saveeŋ toozi: Iduduun, ma mako? \*

<sup>30</sup> Ve isaav ighe tamtamon eta isavsaav, ve tamtamon ite ileep ve Maaron ivotia ŋgar eta pani, ene i tau isavsaav na, irau ineneeŋ ve ighur sooso pa iitete, lesa aana isavsaav. <sup>31</sup> Tauvene yam to avotia Maaron aliŋa imin propet na, irau ataghon ŋgar tauvene: Tamtamon ee isavia saveeŋ tooni le isov, mako ite aana isavsaav. Leso aseŋ ŋgar to tamtamon tisov, ve apalot zi. <sup>32</sup> Alooŋ. Isaav ighe ŋeer eta loolo ipazaagha ighe ivotia Maaron aliŋa imin propet, ene i aat irau iyai ghi, ve isaan le iitete ipasov saveeŋ tooni, o aana isavsaav.

<sup>33</sup> Pasaa, Maaron toit, i Maaron to ikaukau ŋgar mako. I ighe gabua naol isov ilaan duduuŋ mon. Ve i ighe iit tasov talup ghiit tamin eemon ve

---

\* **14:26:** Ro 14:19; 1Kor 12:7+; Ep 4:12      \* **14:29:** Mbanj 17:11; 1Tes 5:20+; 1Yo 4:1

tataghon n̄gar luuma. Tamtamon tisov to Krisi titaghon n̄gar tauvene ila lupuuñ toz toz.

<sup>34</sup> Isaav ighe alup gham pa sunjuuñ, na zilivaa irau tisavsaav mako. Yes aat tineneeñ mon, titatan tauzi, ve tileep ila zitamoot sambazi itaghon tutuuñ to Maaron. \*

<sup>35</sup> Isaav ighe lezi ghasoniin̄ siriv, na tila ruum toozi, o tighason azuwazña. Pa ighe livaa eta isavsaav ila lupuuñ tsiam loolo, ene igham mayaña. \*

<sup>36</sup> Laak, yam tau azoroor ghau ne, mindai? Aghe Maaron aliinja ivot tsiam muuñ, ra ila pa nugh siriv? Ma aghe yam mon ta saveeñ to Maaron ilat ivot tsiam? <sup>37</sup> Alooñ. Isaav ighe tamtamon eta igham n̄gar ighe i propet to Maaron, ve itaghon n̄gar to Maaron Avuvu, na i aat ighilaal ighe saveeñ tau naboode payam, ene tutuuñ to Tiina toit, ve iyok pani. \*

<sup>38</sup> Ve isaav ighe tamtamon eta maata veleghin saveeñ tsiau tane, na matamim ila pani sov. †

<sup>39</sup> Tauvene yam tonvetaz, azuari gham pa n̄gar to votiaan̄ Maaron aliinja pa tamtamon imin propet. Ve yes tau Maaron Avuvu ipaburigin zi gha tisavia saveeñ imin kaolaan̄ na, an̄galsekin zi sov. \*

---

\* **14:34:** Ep 5:22; Kol 3:18; 1Tim 2:11+ \* **14:35:** Yes Grika tighita tighe saveeñ tau zilivaa tisavia, ene gabua to eval tiina mako. Ene gabua azuwazña zitamoot mon. Saveeñ ziiri tane, puughu ighazoon̄ mako. Livaa tau isavsaav ila lupuuñ to Krisi loolo na, igham mayaña pa sei? Igham mayaña pa tauu, azaawa tamoot, ma lupuuñ to Krisi. \* **14:37:** 2Kor 10:7; 1Yo 4:6

† **14:38:** Eez ite to tator saveeñ tane, ene vene: “Ve isaav ighe tamtamon eta izoor saveeñ tsiau tane, ene i paam Maaron pale izori.” \* **14:39:** 1Kor 12:31; 1Tes 5:20

<sup>40</sup> Yam aat ataghon dudunjai sunjuun nğara ta naol ne, lesu sunjuun tsiam ilaan poi, ve iduduun mon.

## 15

### *Krisi imaat ve iburig pa mateegh wa*

<sup>1</sup> Yam tonvetaz, yau naghe napei nğar tsiam muul pa vaaru poia tau navotia payam gha aghamu wa. Vaaru poia tane, ta aazne ayozyooz ila. <sup>2</sup> Vaaru poia tau muun navotia payam na, isaav ighe aghur ila ve akisi tunja, ene aat imin eez payam to Maaron igham mulin gham. Eemon isaav ighe akisi mako, ene aat imin kaut sorok ve aghita ghuruun ila tsiam anoonja mako. \*

<sup>3</sup> Saveen tiina kat tau muun tisavia payau ve anag nasakia ilat payam, ene vene: Krisi, i igham niaan ve imaat pa sosor toit itaghon Maaron aliinja tau tiboode pataghaan na. \*

<sup>4</sup> Ve titavia izila mateegha niazi ve mbon imin tol, ra Maaron ipaburigini pa mateegh. Ene paam itaghon Maaron aliinja tau tiboode pataghaan na. \*

<sup>5</sup> Saawe tau iburig, i ila ivot to Petrus imin maata. Ra ila ivot to mbanoonja tooni tisov gha tighita. \*

<sup>6</sup> Murei ra, i ila ivot to tonvetaz tooni irau 500 ve geege siriv gha tisov tighita. Zeran tawe, katini tilepleep soone. Ve siriv timaat wa. <sup>7</sup> Ra ivot to Yakobus \*

---

\* **15:2:** Ro 1:16, 11:22; Hib 3:14      \* **15:3:** Is 53:5+; Ga 1:4; 1Pe 2:24      \* **15:4:** Lu 24:46      \* **15:5:** Mk 16:14; Lu 24:34+; Yo 20:19  
\* **15:7:** Yakobus tane, ene Yesu taazi.

gha ighita. Mako ila ivot muul to mbanjoona tooni tisov.\*

<sup>8</sup> Yes mbanjoona tooni tisov tighita ve ilam ilam le murei, ra ivot tsiau gha anag naghita paam, ve isov. Onoon, yau namin mbanjoona tooni itaghon eez ite pa mbanjoona siriv. Yau namin tamtamon tau tiina ipoopaa ila saawe tooni duduun mako. † \*

<sup>9</sup> Mbanjoona tisov to Krisi ezazi iliiv ghau. Onoon, yau mbanjoona tooni paam. Eemon naghita taug naghe yau poiag irau to tiwaat ghau tigha mbanjoona to Krisi mako. Pa muun, naghur patajani naol pa Maaron lupuun tooni.\*

<sup>10</sup> Eemon poia to Maaron itoor ghau, tauta namin mbanjoona to Krisi ve aazne nataghon ngar tooni. Poia tooni iza tsiau sorok mako. Ighur anoonja. Pasaa, yau naghama katin uraat le naliiv mbanjoona tisov. Eemon yau taug mako. Poia to Maaron igheen tsiau, tauta ipapalot ghau gha naghama uraat tane.\*

<sup>11</sup> Tauvene isaav ighe yau, ma mbanjoona siriv nivotia vaaru poia pa tamtamon, ene yei nisov niasavia saveen tauvene pa mateegh ve burigiin to Yesu Krisi. Ve saveen tane, tauta yam aloonja gha aghur ila.

### *Maaron pale ipaburigin yes mateegha*

---

\* **15:7:** Mbanj 1:3+ † **15:8:** Saawe tau Yesu ilepleep izi taan, mbanjoona tooni siriv tilaghlaagh tomania. Tauvene tighita uraat tooni ve mateegh tooni paam. Ve saawe tana, Yesu ighur zi timin mbanjoona tooni. Eemon Paulus, i ilaagh tomani zi mako. Yesu imuul izala pa sambam ve murei ra, ivot to Paulus ve ighuru imin mbanjoona tooni. \* **15:8:** Mbanj 9:3+; 1Kor 9:1 \* **15:9:** Mbanj 8:3; Ga 1:13; 1Tim 1:13 \* **15:10:** 2Kor 11:5, 23, 12:11+; Kol 1:29



<sup>12</sup> Yei nivovotia saveeŋ pa tamtamon tauvene: “Maaron ipaburigin Krisi pa mateegh wa.” Ige tauvene, puughu mindai ta tsiam siriv tigde Maaron irau ipaburigin yes mateegha mako? \*

<sup>13</sup> Aghita. Isaav ighe saveeŋ toozi tawe onoon, ve mateegha irau tiburig mako, na Krisi paam, Maaron ipaburigini pa mateegh mako. <sup>14</sup> Ve ighe Maaron ipaburigin Krisi pa mateegh mako, na saveeŋ tau yei nivovotia ne, ene saveeŋ sorok. Le anooŋa mako. Ve ghuruuŋ ila tsiam paam, ene gabua sorok. <sup>15</sup> Ve gabua ite. Isaav ighe Krisi iburig pa mateegh mako, ene yei tane nigham karom payam pa Maaron eeza. Pasaa, nipariaaŋ tamtamon to tighur ila tigde Maaron ipaburigin Krisi pa mateegh wa. Eemon isaav ighe saveeŋ tsiam tana onoon, ve mateegha irau tiburig mako, ene Krisi paam, Maaron ipaburigini pa mateegh mako. <sup>16</sup> Nayol saveeŋ tsiau muul. Isaav ighe mateegha irau tiburig mako, na Krisi paam, aat Maaron ipaburigini pa mateegh mako. <sup>17</sup> Ve ighe Maaron ipaburigin Krisi pa mateegh mako, ghuruuŋ ila tsiam, ene gabua sorok. Le anooŋa mako. Ve sosor tsiam ighengheen soone. <sup>18</sup> Ve yes tau tighur ila to Krisi ve timaat na, yes paam tilalez wa. <sup>19</sup> Iit taghurghur mataan pa burigiin to yes mateegha ve lepoogh poia tau pale Krisi igham pait. Eemon isaav ighe saveeŋ to lepoogh tawe, ene onoon mako, ve taghurghur mataan pani sorok, ene takaria tauun wa. Pasaa, saawe tau taleep izi taan, iit tabadbaad pataŋani naol. Tauvene tamtamon aat lolozi isaghatin ghiit iliiv

---

\* **15:12:** Mbaŋ 2:32, 4:33, 5:30+

tamtamon tisov to taan tau tileep saghat na.

<sup>20</sup> Eemon mako! Maaron ipaburigin Krisi pa mateegh wa. I imin aniiñ maata tau imatuugh ila uum imin maata. Pasaa, i ta imuun pa mateegha tisov tau pale tiburig pa Mboñ Murei. \*

<sup>21</sup> Aghita. Muun, ñeer ee ta imin eez pa mateegh ivot. Burigiin to yes mateegha tauvene paam. Neer ee ta imin eez pani gha ivot. Ene Krisi. \*

<sup>22</sup> Iit tamtamon tau tavot ila to Adam na, tasov taleep ila sosor tooni loolo. Tauta iit tasov tamatmaat. Ve yes tau timin Krisi le ve tileep tunja ila tooni na, tauvene paam. Murei, Maaron pale ipaburigin zi tisov, ve tileep matazi yaryaare.

<sup>23</sup> Eemon tamtamon tisov aat titaghon saawe toz toz. Krisi ta iburig pa mateegh imin maata. Ve tala tala le saawe tau ighe i imuul ilam, mako tamtamon tooni tisov anazi tiburig. \*

<sup>24</sup> Gabua tawe isov, mako taan saawe ivot, ve i pale ipasov yes pooza, ve daaba tisov tau ezazi tintiina, tomania gabua isov tau tapirizi tiina na, le tisov tilalez. Mako ipul uraat to ghamuun pooz imuul ila Taama Maaron niima. <sup>25</sup> Pasaa, Krisi aat igham pooz itaghon Maaron ñgar tooni le irau itatan koiña ve tapirizi isov kat, ve ivaghaaz zi ila aaghe saamba. \*

<sup>26</sup> Ve koia tau pale ipasovu murei geeg, ene mateegh. \*

<sup>27</sup> Maaron aliinja tau tiboode na isaav ighe:

---

\* **15:20:** Mban 26:23; Kol 1:18; 1Pe 1:3; Syg 1:5      \* **15:21:** Gnp  
 3:1-19; Yo 11:25; Ro 5:12+      \* **15:23:** 1Tes 4:15+      \* **15:25:** Mbo  
 110:1; Mt 22:44; Hib 1:13      \* **15:26:** 1Kor 15:54-57; Syg 20:14, 21:4

“Maaron ighur gabua tisov tileep ila i saamba wa.” Onoon, saveeņ tane isaav ighe gabua tisov tileep ila Krisi saamba. Eemon Maaron, i ileep ila Krisi saamba mako. Pasaa, i ta ighur gabua tileep ila Krisi saamba. \*

<sup>28</sup> Murei, saawe tau gabua tisov tileep duduun ila Naatu saamba, Naatu pale ighur tauu ila Taama Maaron saamba. Leso Maaron imin daaba pa gabua tisov, ve iņginiir zi.

<sup>29</sup> Laak, naghe naghason gham. Isaav ighe mateegha irau tiburig mako, puughu mindai ta yam siriv aghe agham mateegha tsiam niazi, ve tigham yaa payam? Aghamgham ngar tana pasaa? Pale iuul zi mindai? <sup>30</sup> Ve puughu mindai ta saawe isov, yei nibadbaad pataņani pa Krisi eeza, ve nireirei taumai pa zaab. \*

<sup>31</sup> Yam tonvetaz, yam agham ghau lolog poia pasaa, uraat tsiau ighur anooņa ivot ila sosomim gha amin Tiina toit Yesu Krisi le wa. Ila i maata, yau nasaav ghazooņa payam naghe: Mateegh iņaņarui ghau irau saawe. \*

<sup>32</sup> Isaav ighe yau nataghon ngar to tamtamon mon pa uraat tau naghhamghamu ne, puughu mindai ta narei taug gha yeņa gabua sagsaņa niparav izi nugh Epesus? Yau naghe naghham saa kat, ta nabaad pataņani tawe? Isaav ighe mateegha irau tiburig mako, o tambaajo. “Taghanghan, taghunghun, ve tail leen lepoogh poia izi taan. Pa bogzo ma ezau gha tamatmaat.” \*

---

\* **15:27:** Mbo 8:6; Mt 28:18; Hib 2:8; 1Pe 3:22 \* **15:30:** Ro 8:36; 2Kor 11:26 \* **15:31:** 2Kor 4:10+ \* **15:32:** Mban 19:23+; 2Kor 1:8

<sup>33</sup> Yam ayamaan gham. Apul tamtamon titommbaan gham sov!

“Pa ighe iit tau tataghon ngar poia ne, tapaak zeran sasaghati, ene pale tiyes ghiit pa ngar toozi, ve ngar toit isaghat paam.”

<sup>34</sup> Ngar tsiam ikaukau irao! Agham ngar poi, ve apul ngar sasaghati ileple, ve ataghon ngar tau iduduun ila Maaron maata. Yau nasaav ghazona payam: Mayamim. Pasaa, yam siriv awatagh Maaron rigta mako.

*Anoŋaan paaghu pale ariaaŋa ve irau isaghat mako*

<sup>35</sup> Aiyo. Tamtamon eta aat ighason ghau tau-vene: “Isaav ighe Maaron ipaburigin yes mateegha, pale ipaburigin zi mindai? Ve saawe tau tiburig, pale igham lezi anoŋazi paaghu ghitoona mindai?”

<sup>36</sup> Yo borau! Lem ngar mako! Ughita. Isaav ighe tavazogh gabua eta uuve, ene aat uuli imbuuz gha ilale, mako paaghu tooni itum iza. \*

<sup>37</sup> Ve isaav ighe tavazogh wit, ma gabua ite paam uuve, ene pale paaghu tooni tau murei itum iza na ghitoona raraate imin uuv tau tavazoghi ne mako. Pale ghitoona ite. <sup>38</sup> Ve Maaron igham gabua tau tavazogh zi na titum tizaa, mako enaena tighur ayazi, bogazi, rauazi, runguzi, ve anoŋazi itaghon i tauu ngar tooni.

<sup>39</sup> Gabua tau tileep izi taan ne, mizazi raraate mako. Iit tamtamon mizaan ite, ngai toozi ite, man toozi ite, ve iigh tauvene paam, mizazi ite.

---

\* **15:36:** Yo 12:24

<sup>40</sup> Ve gabua tau tighen ila sambam saamba na, anoŋazi ite. Ve gabua to taan, anoŋazi ite. Ve gabua to sambam saamba pabodeŋazi ite pa gabua to taan. <sup>41</sup> Aaz mbonari, ene ite pa kaiyo mbonari. Ve pitum tauvene paam. Mbonarizi ite pa aaz ve kaiyo mbonarizi. Ve pitum tisov raratezi mako. Pitum enjaeŋa mbonarizi ite ite.

<sup>42</sup> Burigiin to yes mateegha, ene ngara raraate. Isaav ighe tamaat ve titavi ghiit, ene anoŋaan izila taan ve imbuuz gha ilale. Eemon saawe tau Maaron ipaburigin ghiit pa mateegh, i pale igham leen anoŋaan paaghu. Anoŋaan paaghu tana pale ariaaŋa ve irau isaghat mako. <sup>43</sup> Anoŋaan tau titavia izila taan, ene ghitoonja poia geeg mako. Eemon murei, saawe tau Maaron ipaburigin ghiit pa mateegh, i pale igham leen anoŋaan tau poia le poia kat, ve mbonari tiina. Anoŋaan tau titavia izila taan ne, le tapiri mako. Eemon saawe tau Maaron ipaburigin ghiit pa mateegh, i pale igham leen anoŋaan paaghu tau le tapiri tiina. \*

<sup>44</sup> Anoŋaan tau titavia izila taan, ene gabua to taan. Eemon saawe tau Maaron ipaburigin ghiit pa mateegh, ila Maaron Avuvu tapiri, iit pale tagham leen anoŋaan paaghu tau irau to ileep izi sambam.

<sup>45</sup> Maaron aliinja tau tiboode na, isaav ighe:

“Adam, njeer tau Maaron ighuru imin maata na, iburig imin tamtamon, ve maata iyaryaar.”  
\*

---

\* **15:43:** Mt 13:43; Pil 3:20+; Kol 3:4      \* **15:45:** Gnp 2:7

Ve Adam ite tau ivot murei †  
na, i Avuvu ta igham ghiit taleep mataan yaryaare  
le alok. \*

<sup>46</sup> Tauvene ñeer to sambam imuunj mako. Ñeer to  
taan tomania taan lepoogha ta ivot imin maata.  
Ra ñeer to sambam ilam tomania lepoogh paaghu  
to Maaron Avuvu. <sup>47</sup> Adam tau ivot imin maata na,  
Maaron igharaata pa taan. Tauvene i tamtamon  
to taan. Ve Adam ite tau imin ru, i ileep nugh  
sambam ve izilam. \*

<sup>48</sup> Tamtamon tisov to taan, anonjazi ve lepoghazi,  
ene imin ñeer to taan tau Maaron ighuru na. Ve  
yes tau pale tileep izi nugh sambam na, anonjazi  
paaghu ve lepoghazi, ene imin Ñeer tau ileep sam-  
bam ve izilam. <sup>49</sup> Aazne, lepoogh toit, taleep imin  
ñeer to taan tau Maaron ighuru na. Ve murei  
tauvene paam. Iit pale taleep imin Ñeer tau ileep  
sambam ve izilam na. \*

<sup>50</sup> Yam tonjvetaz, yau nasaav payam tauvene:  
Anonjaan to taan, ene irau igham lepoogh to nugh  
sambam mako. Pasaa, gabua to nugh sambam  
irau isaghat mako. Tauvene gabua tau isasaghat  
imin anonjaan to taan, ene irau igham lepoogh to  
nugh tawe mako. Maaron aat igham leen anonjaan  
paaghu, o tagham lepoogh tawe. \*

---

† **15:45:** Adam ite tau ivot murei na, ene Kriisi. Ves 47 iwaato igha:  
“Adam ite tau imin ru na.” Saveen tane, ngara tauvene. Adam tau  
ivot imin maata na, iit tasov tavot ila tooni. I puughu toit. Tauvene  
saawe tau i igham sosor, iit taleep ilonj ila sosor tawe paam. Kriisi  
tauvene paam. I puughu to lupuunj paaghu, ene yes tamtamon  
tooni. Yes tau tipaako na, tileep ila mateegh ve burigiinj tooni loolo.

\* **15:45:** Yo 5:21, 24; Ro 5:15+ \* **15:47:** Gnp 3:19; Yo 3:13, 31

\* **15:49:** Ro 8:29+; 1Yo 3:2 \* **15:50:** Yo 3:5+

*Maaron igham ghiit taliiv mateegh*

<sup>51</sup> Aloonj. Yau naghe napaghazonjai gham pa gabua ee tau muunj iyoonj, ve aazne Maaron isavia ivot ighazonj. Tamtamon toit siriv aat timaat mako. Pasaa, saawe to Mbonj Murei, Maaron pale itoor ghiit tasov ve tagham anonjaan paaghu.

<sup>52</sup> Tavuur tau Maaron ighuru to itanj murei geeg na, pale itanj, ve rekia mon Maaron ipaburigin yes mateegha, ve igham lezi anonazi paaghu tau irau isaghat mako. Mako iit tau tamaat soone ve talepleep ne, anaan, Maaron pale itoor ghiit, ve igham leen anonjaan paaghu. \*

<sup>53-54</sup> Pasaa, anonjaan to taan tau tisaghat gha timaat ne, Maaron aat itoor zi. Leso timin paaghu, ve irau tisaghat, ma timaat muul mako. Gabua tane ighe ivot, ene pale Maaron aliinja ziiri ee tau tiboode na, ighur anonja. Isaav tauvene:

“Maaron iparav ariaanj, tauta iliiv mateegh tapiri, ve ipasovu le isov kat.” \*

<sup>55</sup> “Mateegh, tapirim to uliiv ghei igheen sindei?

Aa mateegh, iiz tsio to unjal ghei pani ne, igheen sindei? Mako.” \*

<sup>56</sup> Pasaa, iiz to mateegh, ene njar saghati. Ve njar saghati ighamgham tapiri ila tutuunj. \*

<sup>57</sup> Eemon iit tapait Maaron toman loloon poia! Pasaa, ila uraat to Tiina toit Yesu Krisi, Maaron igham ghiit taliiv njar saghati ve mateegh. \*

<sup>58</sup> Tauvene yam tonvetaz tau lolog igheen tsiam kat na, yau nasaav payam: Ayooz ariaanj, akis

---

\* **15:52:** Mt 24:31; Pil 3:21; 1Tes 4:15+      \* **15:53-54:** Is 25:8

\* **15:55:** Hos 13:14      \* **15:56:** Gnp 3:3; Ro 4:15, 5:12, 7:9+

\* **15:57:** Ro 8:37; 2Kor 2:14; 1Yo 5:4+

ghuruuñ ila tsiam tunja, ve apul taumim kat pa uraat to Tiina toit irau saawe. Pa yam awatagh: Isaav ighe i ileep tomani gham pa uraat tsiam, na yam arav taumim sorok pa uraat mako. Uraat tsiam pale ighur anooja. \*

## 16

*Paulus ipalot yes Korin to tiuul zetazja tau tileep izi Yerusalem na*

<sup>1</sup> Aiyo, yau leg saveeñ rig payam pa maet tau aghe agooga pa Krisi tamtamon tooni tau tileep izi Yerusalem na. Yau naghita eez tau naghuru pa lupuuñ to Maaron tau tileep izi taan sirivu to Galesia na, yam ataghoni paam, o poia. \*

<sup>2</sup> Saawe imin maata to wik tisov, na yam enjaeña aat aghur maet tsiam siriv ila soghan itaghon uraat tsiam atuya. Leso ivot imin tiina ve isañan pa saawe to nalat. Ataghon aliñag tane, o poia. Pa ighe nalat ve agooga soone, ene poia mako. \*

<sup>3</sup> Ve aghur tamtamon tsiam siriv tau aghit zi aghe tirao, lesu tigham maet tau agooga na ila pa toñvetaz toit tau tileep izi Yerusalem. Saawe tau nalat, yau aat nabood rau siriv imin paesiin pazi, lesu tikis zi ve tila. <sup>4</sup> Ve isaav ighe naghita naghe poia to yau paam nala, ene aat yeña nila.

*Paulus ipaesia laghoonj tooni*

<sup>5</sup> Yau naghama ngar naghe nala naghita zetaanna siriv tau tileep irau taan sirivu to Masedonia. Tau-vene yau aat nala naghit zi muun. Le isov, o nalat

---

\* **15:58:** Ga 6:8; Hib 6:10; Syg 14:13      \* **16:1:** Mbanj 24:17; Ro 15:25+; 2Kor 8:1+      \* **16:2:** Mbanj 20:7



naghit gham. <sup>6</sup> Ve naghe naleep tomani gham malau rig. Tauvene matag injal naghe naleep tomani gham le saawe to nugh yaunja isov, o yam irau aghit ghau pa laghoonj tsiau, ve aghur ghau nala pa nugh sindei tau naghe nala pani. <sup>7</sup> Lolog pa nagig gham mon ve nala mako. Tauvene isaav ighe Maaron loolo tauvene, ene aat itinja taleep malau rig. <sup>8</sup> Eemon irau nala Masedonia rekia mako. Pale naleep izi nugh Epesus le irau lupuunj tiina to Pentekos ivot, o nala. <sup>9</sup> Pasaa, Maaron ikaak eez payau to nagham uraat tiina izi ta sene. Ve naghita naghe uraat tsiau ighurghur anoonja. Eemon eval tiina tizorzoor saveenj tsiau paam. \*

*Paulus ipaes pazi pa Timoti gha Apolos*

<sup>10</sup> Isaav ighe aghita Timoti ilat peria tsiam, na aghamu toman lolomim poia. Leso saawe tau ileep tomani gham na, iroi sov, ve loolo poia. Pa i ighamgham uraat to Tiina toit Krisi, raraate imin yau. \*

<sup>11</sup> Tauvene tamtamon eta maata veleghini sov. Ve saawe tau i ipaburigin laghoonj tooni muul na, yam auule, ve aghuru toman loolo poia, ve imuul ilam tsiau. Pa yau nasasanjani tomania tonvetaz toit siriv.

<sup>12</sup> Ve tonvetaz toit Apolos, saawe naol yau nasavsav ariiaanj pani naghe yesnja tonvetaz toit siriv tilat tighit gham. Eemon loolo pa ilat pa saawe tane mako. Pale ighita sooso eta, o ilat ighit gham.

*Paulus iparwai saveenj tooni*

---

\* **16:9:** 2Kor 1:16; Kol 4:3; Syg 3:8      \* **16:10:** 1Kor 4:17

13 Matamim imomoos poi, ve ayooz ariaan pa ghuruun ila tsiam. Aroi sov. Apariaan taumim, ve ayooz tunja. \*

14 Ve saa ngar tau yam aghe aghamu, na aghamu itaghon ngar to loloon pa tamtamon. \*

15-16 Yam awatagh: Stepanas ve yes tau tileep tomania ila ruum tooni na, timuun pa yam Akaia asov, ve tighur ila to Krisi imin maata. Ve yes tirei tauzi kat pa uraat to Tiina toit, ve tibesbees poi pa tamtamon tooni. Zeran tauvene, tomania tamtamon tisov tau tiuluul zi ve tipul tauzi kat pa uraat to Maaron na, naghe napalot gham to aleep ila sambazi, ve aloon alinazi. \*

17 Saawe tau Stepanas tomania Portunatus ve Akaikus tilam tivot tsiau, yes tigham ghau lolog poia kat. Onoon, yam eval irau alam mako. Eemon yes tigham naghomim gha tilam tivot sene, ve tiuul ghau pa gabua siriv. 18 Tauta tipalot ghau ve tigham ateg izi, imin monmon tighamgham payam na. Tamtamon tauvene, yam aat apakur zi.

19 Lupuun tisov to Krisi tau tileep izi taan sirivu to Asia ne, tigham aaz poia toozi ilat payam. Akwila yesuru Prisila tomania yes tau tiluplup zi pa sunuun ila ruum toozi na, lolozu igheen tsiam kat. Tauvene yes paam tigham aaz poia toozi ilat payam ila Tiina toit eeza. \*

20 Ve tonvetaz to Krisi tau yenza nilepleep ne paam, tisov tigham aaz poia toozi ilat payam.

---

\* **16:13:** Mbo 31:24; Ep 6:10      \* **16:14:** 1Kor 13:1+; 1Pe 4:8

\* **16:15-16:** 1Kor 1:16; Pil 2:29; 1Tim 5:17; Hib 13:17      \* **16:19:** Mban 18:2, 18, 26; Ro 16:3, 5

Yam asov tonvetaz to Kriisi. Tauvene lolomim poia pa taumim ve avataki nimamim. \*

<sup>21</sup> Ene yau Paulus. Nabood aaz poia tane ilat payam pa taug nimag. \*

<sup>22</sup> Isaav ighe tamtamon eta loolo pa Tiina toit mako, ene pale aatyavyav to Maaron iza tooni.

O Tiina tsiei, ulam lak! \*

<sup>23</sup> Poia to Tiina toit Yesu igheen tomani gham.

<sup>24</sup> Yau lolog igheen to yam asov. Pasaa, Yesu Kriisi ilup ghiit ve taleep ila tooni.

---

\* **16:20:** Ro 16:16      \* **16:21:** Kol 4:18; 2Tes 3:17      \* **16:22:** Paulus ibood ziiri tane ila yes Aramea alinjazi. Isaav ighe: 'Marana tha'.

**Maaron Saveen Tooni Patabuyaang  
The New Testament and portions of the Old Testament  
in the Tuam dialect of the Saveeng language of Papua  
New Guinea. The Saveeng language is also called the  
Mutu language.  
Sampela hap Buk Baibel long tokples Saveeng Tuam  
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

---

PDF generated using Haiola and XeLaTeX on 22 Feb 2024 from source files dated 31 Aug 2023

adb844f0-d769-5b05-9dd0-7c01fca938bb